

黃海

卷第

天都逸史潘之恒景升輯

姑射仙史張銓平叔校

紀游四之一中

崆峒山

吳同春游紀云崆峒在平涼西三十里駟卿王陽父

駐平涼約登崆峒盖踰年前云萬曆壬午孟秋念二

日余自蘭州抵平涼十餘日畢讞務是為八月二日

韓藩召宴暖永夜分歸明日陽父及冏卿馬元復設

具期以四日往適冏貳郭子稱以履任至五日三君

早至山下爲東道主而余出城西門循涇南澗以已刻至問道宮言乃軒轅與廣成赤松子問道所因名宮多遊人石刻泚讀之飯已由宮之東聯輿北土二里許爲觀音菴又二里爲片石蓋大石旁仆而中含小石圓明如月又里許讀宋游師雄題名碑有峯如柱當路之中道士曰此蠟燭峯也由峯左側盤曲而上稍東而北約二里爲潭沱寺酒數舉余與三君謀曰稍遲則不及盡覽諸峯矣由潭沱東上爲東峯旁有眺豐亭今廢履舊趾東眺則平涼以東諸郡縣犁然目中對東峯而峙則望駕山也舊傳軒轅問道登

此山望駕因名峯下數百丈崖多內泐其深杳處爲玄鶴洞側身下視不見所謂玄鶴者以飛石擊之石匄匄震巖谷玄鶴竟不出由東峯稍北爲中峯中峯下東峯十之二不暇憩且行且飲稍北至北峯過仙橋者二石皆天成坐峯頭少頃由峯之右北視衆壑奔馳崖塹陡絕捫藤而下尋所謂丹穴皆榛莽耳復捫藤而上西南折登西峯西峯寄西澗絕處視四峯稍不屬高與北峯伯仲由故道東數百步望西南有峯突起道士曰此崆峒之頂也其路甚險自麓之巔道士創爲三天門余與三君且輿且步至一天門不

能輿子稱感只視足問路遠近余三人默知子稱倦促之行至三門鑿山為級旁豎鐵柱垂鍊徑偏仄人不得掖余與三君蟻附而登未及峯百餘步為磨針巖稍坐至峯頂謁真武祠祠西南高處有六角亭扁曰筭頭勝槩蓋登此或可望筭頭而此非筭頭也坐良久題崆峒絕巘四字於石東視五峯起伏向背如埤如培共訝其方浮而忽沉若趨而遭踣也由峯前南折為三官祠又其下為雷神祠皆在絕巘間酒數舉一青衣報子稱倦且回俟潭沲矣余三人笑曰此子稱問路遠近意也峯西望有峯出峯之半與峯

連道士曰此馬駿山也余疑所謂山巔為諸峯莫與齊今馬駿高踰茲峯安得謂茲峯為巔謀西登馬駿顧日將暝二君令以炬從百步一息至其半五山突出崖端秀拔峭削而無名余三人笑曰何不呼為小五峯路南折飛沙驚墮足寸移回視二君以綆牽挽喘息而上陽父意堅不可遏元復呼茗潤喉問此去路猶幾許余與陽父笑曰元復亦問遠近矣又半里至其巔峯巒拱護林木葱茂履峻巖四視漢江由西南前繞黃河由西北後旋洛水自巽而艮補其缺秦關四塞其圓如璧渭流滌迴于中時作斷壘太華昂

首招於左吳山鞠躬遜於右終南太白蹲踞不恭岷嶺峩峩若跂足盼望而苦不及唯崑崙不可見陽父指日北三舍曰或不出此間元復叱曰吾三人何不騎日往觀之忽大笑無何新月一鉤掛山外人行樹底影落衣班山鳥聞人聲時或驚墮嵐光暝色勃生鬢眉清風盪林壑颼颼作笙簧音爽氣侵骨神思空寂恍然見軒轅赤松君色相而隱然聆廣成子守一處和之玄指也席地坐香山寺與僧論禪至色空極處余三人愴然念我等何異水上漚石間火也已持炬觀朝陽洞元復得句山高平對月余與陽父應以

寺迴俯看雲因各足成近體鑄于石間笄頭所在僧曰此去而西三十里蓋涇水發源所其上有湫卽古朝那秦殺文詛楚處涇由峯下迤問道宮而東此崆峒之前峽也其後一支由峯北至北峯東南折與涇合此崆峒之後峽也崆峒介在二峽之中獨立縑紗之外茲峯雖名馬駿實崆峒絕頂爲人跡所不到故呼東高峯爲頂東高峯一名小馬駿揆地準天崆峒當斗極之下故爲神仙之奧宅寰宇之名區也余憶爾雅其云位當斗極說蓋不誣因題峯連北斗四大字于巔二君曰吾等不登此安知崆峒別有巔余謂

二君曰吾等不登崆峒之巔又安見所謂崆峒者天下事以目力所至爲極奚獨此耶還至東高峯道士以樓成請額余曰坐此可濯挹涇水額以挹涇濯涇孰善二君曰挹涇善遂從之稍下報子稱意余三人宿馬駿先自潭沱回矣余三人至潭沱漏下三鼓三爵就寢晨起緩步登南峯南峯在潭沱東南稍下于東峯卽自問道宮來路左之高巖也席地坐見大峒山隔峽屏立涇流淼淼東注日射其宛折如素練之縈結也已回至蠟燭峯擬四字刻石余憶山海經云華西七百里爲高山蓋指崆峒刻華西高山何如二

君曰善復由問道宮而東共念吾等茲行可謂無恨獨未見玄鶴去意惘然如失洞在東崖路傍可睨共立輿仰視淡雲如縷時復掩蔽移時弗見延佇咨嗟輿將移元復忽詫曰玄鶴出矣余二人回盼則孤騫巖表數四回翔若有情余三人者不覺鼓掌已復入洞更候之弗出矣道士曰鶴之出有時遊此而見者甚少自軒轅問道以來時有之數千年物也元復曰吾等至少遲則弗見少疾則亦弗見此真志一動氣景與意會也遂行日暮至平涼明日東門余別三君去

遊王母宮記

卷中

萬曆壬午

吳同春曰余自平涼東趨涇州至涇汭之交郡守張子來逆指回山視余曰茲王母宮聞古今舊矣縉紳先生過此咸一謁明公有意否乎余方有心懇于王母應曰可由關王廟而西盤旋而上至其半有樓扁曰山高水長又其上爲虎山廟去虎山百餘步爲青鳥亭余心笑曰青鳥爲王母傳事余至此王母應先知矣亭左右老栢數十株其狀如虬又其上四栢對列獨西北一株可作茗人呼爲茶栢道士烹而進余啜之味過茗謁紫微帝君登玉皇閣四顧群山環列

于踵涇水東注汭水北注涇郡當東北注之間城中廬舍如櫛周圍城垣似不滿尺正南一峯與郡對爲郡之面山涇以北基土隆隆禾黍互隨高下爲回中舊城而余自白水來之路卽傍回山左腴云又西爲亭亭後有枯株大數圍同本異幹高入雲霄道士呼爲降真不知幾千百年不榮不腐亦神物也後卽王母正殿伐鼓撞鐘俯伏拜謁默爲二親祝眉壽心口自語蟠杳可得願乞一枚歸獻我二親殿後壁有鍾呂二像淡墨揮灑竒偉神彩不類世人摹染詢之則鍾呂二公互圓形于壁從古以來稱仙跡云兩廡列

周穆漢武等像爲傳記諸君有事王母故也又其西爲玄帝宮周圍刻古今詩文自青島亭至山巔皆有刻而此刻獨夥然多元以後人其稍遠而古者元祐間題名及陶學士穀碑文耳余于題名隙處亦濫厠姓名宮後爲官亭張守設具余爲飲數爵已觀壽星祠登三清閣閣廠三面而塞其西旋因穴鑿窻西視出峯轉落如奔如馳二水夾旁日光盪射真天造也道士謂茲山脉聯崆峒故前坊扁崆峒元脉其說亦或有據由玄帝宮之右取道而西數十折而下至瑤池池方數丈中有七星泉由此出稍前爲亭坐亭上

池光如鏡飲泉水甚甘掬以濯目清冷沁骨而林木蔭映山谷回合不虛仙境第無由見當年王母開筵群仙赴宴景象耳余爲題瑤池二字扁其上嗟乎傳謂王母瑤池在崑崙有閨苑十二樓今有宮在茲山之巔豈人無由至崑崙取茲山之近以當之耶抑當年周天子八駿所馳卽此地恐不窮竒無以傳後借言崑崙以侈其事耶抑本無所謂王母八仙之事好異者極其說以肆閎辨無涯之論而後世求之彼不得遂援此以實之耶然此地此山此宮自古迄今矣其前三說有無是非余不暇辨姑因事之見在與吾

足跡之所至寄吾一念愛日之忱耳中秋前七日記
河東王體復一陽識曰大華雖高不當四塞上游若
黃帝問道則自古奇之青島傳書又奇故崆峒勝槩
談者侈焉歲辛巳余爲戎臬伯與以讞獄至京兆相
與倡和甚契無何余轉涼苑遂有崆峒之約因憶余
以公事經平涼者四而未暇登眺今稱崆峒主人何
幸哉明年壬午秋伯與至涼以八月五日如約先是
一日大雨伯與曰明日若此無緣矣次日大晴喜甚
已至問道宮午至諸峯不登絕頂申登馬駿往者少
至馬駿伯與決上及至廼大佳顧秦中山水環在目
前徘徊對月談玄者久之返宿真乘則漏下三鼓矣
厥明窮所未覽歸見玄鶴尤人所難也又明日餞伯
與更雨余與元復嘆曰茲遊也豈不稱勝緣哉晴臬
助興神鳥現形蓋至誠之所感也語曰誠能動物况
山川之靈乎非伯與其孰能與於斯廣成子於伯與
盖有默授矣余擬爲記伯與記先至廼止又不可無
言因綴數語於後冀併傳云是歲重九日

言因... 蓋亦... 山川之靈... 與輻... 與... 前將...

黃海 卷第

天都逸史潘之恒景升輯

交蘆居士李長庚西卿校

紀游四之二

黃山紀游

宋吳龍翰曰咸淳戊辰十月既望魯齋鮑雲龍古梅
吳龍翰足庵宋復一來觀黃山巔巔登高餐胡麻飯
掬泉飲之不火者三日從者皆無人色率不能從予
三人愈清狂上丹崖萬仞之顛夜宿蓮花峰頂霜月
洗空一碧萬里古梅談玄魯齋誦史足菴歌游仙招

隱之章少焉吹鐵笛賦新詩飄然有遺世獨立之興
次躡景鍊丹峰過仙人石橋酌丹泉徜徉久之次紆
路遊水簾洞踏月夜歸少憩蘭寺把酒臨風對天都
而酌之曰吾輩與若爲熟面相識他年志願俱畢無
忘此山昔歐陽永叔謝希深輩遊嵩山吹簫歌古調
吾輩倡酬之樂似之韓退之登華山頂邑令百計取
之得下吾輩冒萬險人跡所不能到其狂又似之然
韓有詩謝有書以紀其奇也吾輩可無一語留作此
山公案乎於是乎書

游山詩

宋附

汪炎昶

游黃山

二首

神仙隱處今始過煙霞城郭路幾何野渡誰浮夕陽
艇空山尚響樵人歌石壇荒涼疊苔蘚谷鳥嘲嘶深
松蘿何妨更值買酒至一笑使我朱顏酡

木末窮蟬鳴不休客子正倦還登樓斷虹閣盡芳草
雨孤鴻點破南林秋樓頭笳聲撼落葉渡口霞影搖
輕舟浮生擾擾事無限搔首坐看斜陽收

焦煥炎

題黃山送別圖

我家黃山隅不識黃山面不自到黃山見圖如不見
如何黃山客又別黃山去落日晚烟昏黃山在何處
黃山有湯泉可以洗滌塵世緣黃山有瑤草可以餌
之長不老黃山有神丹得之可以超塵寰胡為別却
黃山去祇把生綃寫空翠

文天佑

別黃山作

黃山別去恨綿綿華表重尋第幾顛馬跡苔肥連碧
漢龍潭水暖漲靈泉斷無花逐桃溪棹別有春留藥
圃邊鷓鴣一聲人亦老鬢絲驚笑玉顏仙

文及翁

和前韻

靄靄卿雲似擘綿想留弓劍在層巔休尋白鶴千年
事且浴黃山百沸泉阮老溪頭燒藥鼎丁公菴畔煮
茶烟曾知上界足官府鞭鳳笞龍作散仙

汪莘

字叔耕休寧人

黃山歌

黃山高哉巋然為江東之巨鎮兮壁立於兩浙之上
游摩天曼日以直上陽枝陰派盤數州四海不知雨
根本行人但見雲飛浮嘗試芒鞋竹杖造乎其間兮

一溪桃杏紅爛熳萬壑松柏寒颼颼懸崖絕磴可望
不可到兮古木倒挂險更迤上有靈泉千萬道如銀
河爭瀉而競注兮砒雷濺雪隱見穿林幽中有青鸞
黃鶴千萬對雄倡雌和迭舞而交鳴兮深林自適復
有數點白雪之猿猴山中自昔無曆日花開葉落成
春秋殘英脫穎不知其所從來兮但見夫澗谷之間
桃花如笠松花如燾竹葉如扇蓮葉如舟菖蒲九節
餵白鹿靈芝三秀眠青牛人間三月春已暮洞中花
卉春長留奇香異氣逐風去散落塵世誰能酬黃山
高哉雲際一峰尚可畫雲外一峰畫不得霜繒補了

掉首休丹砂一峰燭天爭日月九龍一枝拔地張旂
旒天都一峰傑出於三十六峰兮星斗森羅挂珠殿
日月對展搖瓊樓中有一人兮龍冠而鳳裘左容成
兮右浮丘我時收却釣竿樵具作一束投諸曹阮溪
中流浴余身兮湯泉風余袂兮帶所搜鼓隱隱兮管
啾啾水精盤兮碧玉甌帝酌我兮勞我左右爲余兮
凝眸指余以南峰石壁記授余以紅鉛黑汞大丹頭
黃山高哉余將攬秀巢雲鍊其下坐令萬物不生疵
癘黍盈疇三十二里亦

宋程秘方壺集序云叔耕蘊霞牋玉滴之奇思出

天表蓄而不試憂深思遠未易遽班之賀白也嶧
山積石三十二里孤桐琴瑟而鄒魯地接古稱多
儒休寧斷崖鵝石之秀江南鮮比君殆一奇乎其
為同時所賞譽如此故錄之

斷崖鵝石指落石也

黃海

卷之二

天都山史潘之恒景升輯
澹如居士程開社方叔校

紀游四之三

游黃山記

元汪澤民曰黃山在宣歙境雄鎮東南山之陽踰百
里為歙郡其北三十里為太平縣又北抵宣治所二
百四十里不當通都大邑舟車之走集而游者罕至
今年四月九日予始得游焉山西之麓田土廣衍曰
焦村蓮峰丹碧峭拔攢蹙若植圭若側弁若列戈矛

若芙蓉菡萏之初開雲烟晴雨晨夕萬狀絲焦村南道二十五里至湯嶺上仰視羣峰猶在霄漢間岡阜蟠結鑿石開逕巉巖欹危瀑布聲訇磕如雷怪石林立半壁飛泉灑巾袂當新暑淒然如秋又十里憩祥符寺寺前淙流走萬石間山皆直松名材藤絡莎被菴蔓龍茸有靈泉自朱砂峰來依巖通二小池上池瑩徹廣可七尺深半之毫髮可鑿泉出石底纍纍如貫珠不絕氣秘醇若湯酌之甘芳蓋非他硫黃泉比也明日遂試浴垢旋流出纖塵不留令人心境清廓氣爽體舒相傳沉痾者澡雪立差理或然也寺有南

唐碑初名靈泉院宋祥符中改今額又龍池距寺左三里許奔流噴薄瀉石潭中亭午照燭五色璀璨誠靈物所居夜聞啼禽聲甚異若歌若答節奏疾徐名山樂鳥下山咸無有行寺旁近見數峰凌空僧指云天都芙蓉朱砂峰其尤高者天都也上多名藥採者裹糧以上三日達峰頂予心甚欲遊之而鳥道如線不可上乃止凡再宿寺中還魚村之二日行三十里遊翠微寺古松脩篁石澗橫道僧橋焉覆之屋以息遊者清泠靜邃已隔塵雜予爲榜曰翼然至寺庭有井泉僧言此麻衣師卓錫處泉亦清美不溢不涸一

峰卓然獨秀直時東南隅曰翠微峰其條支迴互寺居盤中故諸峰俱隱不見明發行十五里過白沙嶺往往攀崖壁牽蘿蔓或小木貼巖若棧而度幾不容武旁臨絕壑惴惴焉不敢俯而窺又七里至絕頂頂平廣倍尋方據石少休時晴雨旭霽氣象激潔環視數百里岡巒墟落歷歷可數九華綠翠若蓮開陸焦村向所見峰皆平挹座間俄頃白雲滃起遙山近嶺如出沒海濤僅餘絕頂槎泝天漢中倏又斂藏如掃如是者三可謂奇觀矣日暮纔抵寺亦信宿焉又二日從村北

仙源觀至元中新安吳萬竹習靜

茲壤嘗衍易宛陵誇詡其勝予贈詩還山今竹存而吳逝已久林阜周密南列翠峰練形引年者固其所哉既還憩吾宗公仲雲松樓越十日踰興嶺而南所謂三十六峰者駢列舒張橫絕天表衆岫疊嶺效奇獻秀盡在一覽行田疇竟迺登橫嶺陟小丘道左竹杉陰森中小徑縈紆纒屋數間一僧奇龐近八十煮茗進果自言結構力田間則持經翫空歷二十閏矣外營草亭往來休焉庫陋且壞予將改築亭之右丈餘南峰翔舞迎乎前北隴奔躍駐乎後左右翼如景益清曠名之芙蓉亭而未暇也循巖曲折抵白龍潭

巨石谿衍洶湧衝激深不可測歲旱民謁款雨立至
又度板橋有小菴食淡苦脩數輩居焉嘗有逃空谷
者出奇方療人疾頗衆既亡瘞浮圖中

山史云疑卽松谷菴也

予特徵夫山水繆繞自爲奧區于高峰之下由輿嶺
抵北四十五里人蹟遼邈可屏塵事遂宿焉聽泉而
去凡道途爲里若干皆樵牧負販者隱度云然非有
堦以步而計也世稱黃帝與浮丘容成於此山上昇
改名黃山江浙諸大山所分以出其廣袤形勝若是
奇蹤詭狀固不必盡究然非神人列仙不能稱其居
雖未暇遍而選勝搜奇餘可槩見矣昔大德戊戌歲

得茲山圖經神思飛越而因循皓首甫幸一至至又
弗克久畱而去每登山時率宿雲收雨紫翠如沐山
下之人皆以爲山川英靈有相之者予亦竊自喜回
思向在南安之日造南原山禱雨龍湫跣揭亂石急
流中腰繩梯藤登懸崖上而復下至潭所其巖險視
茲行爲甚是故樂清賞以酬宿昔忘躋攀之勤而不
知高深之爲懼也予當謝事與二三友結宇讀書以
畢餘生較之充訕于聲利而不知止足者不猶愈乎
時至元再元之六年庚辰歲也

游黃山詩

汪澤民

宿祥符寺

屹立四千仞緣回八百盤
藤蘿孤寺合苔蘚一碑殘
風急龍髯斷雲深鶴睡寒
茲山可招隱吾亦掛吾冠
祥符寺和文敬所韻

蒼山寒日近禺中揭淺緣
深足繭重仙子未歸遼海
鶴軒皇曾馭鼎湖龍詩題
古壁無人續夢斷鈞天何
處逢欲問故侯應不識空
遺蕭寺鎖雲峰

獨遊翠微寺

欲雨小雨天黑色將崩未崩石
偏側溪谷綠雲已萬

盤風雨欺人作三厄客遊已慳
天不慳雷電翕歛噓晴暉諸峰
倒景互明滅照耀金碧開山門
清都紫微逼象緯旃林貝樹羅
山磬十方下視沙界迴佛骨不
受炎歊祥麻衣老師寂滅久問
法羞與山僧論但餘卓錫古泉
水念念欲洗塵眼昏嗟予世網
久躑躅坐覽古跡空盤桓莫歸
却覓山下路杳杳飛鳥投芳村
再宿翠微寺

堂上麻衣座堦前錫杖泉人依
碧霄近寺與翠微連山擁無塵
地雲開宿雨天明當凌絕頂禪
榻借高眠

山對無雙出雲開南面正天門
對雲臺學與輦謝昔高
堂上和示重批前殿封泉人
封雲霄長寺與翠嶺
賈古絕空盤鉢莫謂味負山
下祖香香無異好茂林
卓處古泉水念念忘我聖
聖聖到字掛隨入瀟瀟坐
受炎熾新和示未明殊
殊入開法毒與山骨歸
與山骨歸
翻象餘林貝樹羅山禁
十丈寸願少界既漸骨不
却嫌清翠四景已即
然默金雙門山門青
嶺紫嶺
繼風雨其人平三引
容盡已對天不對雷
雷余欲

唐元

字長孺號筠軒官徽州路學教授

暇日謁玄妙李本初有約遊黃山

秋風吹我到仙家菊近重陽未著花
琴美松床鏘白雪丹成石竈吐青霞
休騎天上鶴一隻且讀人間書
五車有約剪刀峰下隱湯泉陰火煮春茶

次韻程以文黃山星橋

今日題橋者燕山耐朔風寄書逢驛使
詢路介樵翁村酒添泉白林曛曬屋紅
浮丘不可見笙鶴度崆峒
黥山絕妙翫不忍去

與夫老若鈍足重肩亦頑堅坐不忍別趨走便且輕

後乘幸勿亟前有黔山迎平生所未識目駭而心驚
委蛇出異態婉婉含深情長虬挂碧落巨怪浮溟瀛
冠冕或儼立甲冑何從橫未吟先恍忽欲畫難經營
邑淳壤最沃俗美人不爭意有隱君子依阻仍深耕
遺世了榮辱避俗變姓名尋之不可見晤言誰與傾

送陳太博遊黃山詩序

陳祖仁字子山汴人至正二年舉進士第

一歷官中書參知政事初為太常博士來遊黃山故人趙子常以詩序贈之

元趙汭曰徽之黃山巨鎮也北倚九華西拓彭蠡南
接廣信諸山其東左挾浙河右起桐汭以盡海壖要
皆支隴所分謂其隤然中居以降勢委和于四表有
坤道上德焉故名之曰黃山然其上則連峰極天巖
岫深窅下則重岡複嶺斗絕環周雖土人有不能遍
求而盡達者故自遜世隱淪之士咸樂居之或以為
由軒轅得名者近古所傳也郡非會通之地四方賓
客無因而至獨唐李太白嘗一游其間為之徘徊而

去遂無復躡其蹤者由是茲山之勝概世罕聞矣至正十一年歲辛卯夏四月浚儀陳公子山寔來游焉始至風雨彌月而山之主僧適遠歸亟率其徒以先導晨發郡城出西郭明霽開豁郊原穆清旦日旣盱始遵其麓澗潦平而波流易涉林沍盡而蘿蔓可緣若有陰相之者乃休僕人領賓從相羊乎松隍竹林之間靈苗不採而自芳丹泉在山而常潔德人君子之恒操猶有可見者乎進而據虎頭之巖以下臨白龍之湫風雲淳興雷雨將作凜然神物不可褻而觀也乃循左巘絕大壑陟層嵒登蓮花之危峰以望八極渾渾焉皞皞焉若有見夫崑崙旁礴兼覆竝育之仁然後知茲山之大根同乎五嶽潤達乎四海而英華發揮精爽洋溢與造物相爲流通而莫知其終始也矧可以方隅論哉振衣下邁授館精廬信宿而還蓋充然若有得者不知我之觀山邪山之觀我邪與吾游者皆自觀其所觀邪抑將同所觀於遊者邪噫以公高情達識如斯其有異乎昔人之來者固宜彼仰首注目望巖而退者於公所存何如也公妙齡積學已超邁等倫俄而貢春官對大廷以第一人及第列官朝著聞譽日隆矣顧猶遠尋名山以發登峰造

極之趣則夫究經綸於功載抱根柢於詞林者何可
 以淺近量哉於是郡之縉紳儒士喜公之能來而惜
 其別去也雜取山中景物有名圖志者相與賦詩贈
 公以寓其嚮往之私詩皆一章章十句五言以予獲
 與斯遊又俾叙其事于右簡是用著茲山得名之實
 極一時之榮觀以告夫繼公而來者

分題詩附錄

諸贈章惜不多見

趙汭

字子常號東山官至江南行樞密院都事

浮丘說詩罷丹成忽為仙荒祠託靈谷瓦缶薦寒泉
 紛紜秦漢間嘉遯良獨賢大雅久不聞支詞瀆真詮

期君發幽隱重以青瑤鏤

右浮丘祠

軒后初制作控洞閔丞黎畫野定疆理無為異標枝
 荒山有遺碣彷彿存蛟螭述德豈倚相論書準秦斯
 期君刊往牒稽首陳貞辭


右軒轅碑

絕澗下深黑寒泉瀉巖隈中有玉蜿蜒不知何年來
 隱顯與道俱泊然息風雷石林維金碧洞府皆樓臺
 善保至陽德春霖遍九垓

右白龍潭

空巖蔭方池丹泉何氤氳炎火孰張設蒸燉泛春溫
 疏瀹得深潤浮游灌靈根外達美陽休內融反胚渾
 翩然披紫綺五色明朝暎

右珠砂泉



原件短缺

卷4

巖居觀物化掩卷獨無思空洞鏘重扇閱此孔壁遺
朋來二三子窈渺強吾詩商聲出金石草樹生涼颺
過門有佳客共賞零風辭 右強歌洞



黃海 卷第

天都逸史潘之恒景升輯
慧業居士潘允宜左之校

紀游四之五

天都社盟詞

陳有守曰維徽古稱山水名郡郡西北有黃山憑據
四州中拔千仞下瞰吳越背負江淮林木插天爰有
三十六峯川流赴海爰有三十六源寔東南群山支
衍之宗湖海巨浸發源之漸煙霞靈氣飛集無時高
士列仙夷猶自昔觀乎浮丘控鶴而往來軒后乘龍

而僊去李白聞吟而暢飲曹公探竒而忘歸誠肥遯

之勝都脩鍊之奧區也嘉靖壬寅秋月有守與王子

亮卿過鄭子思祈高唐西望茲山悠然興懷倡興雅

社折簡同志期以九日登高修好于時踐約者凡十

有六人為程子自邑江子廷瑩民璞余子復初汪子

玉卿王子子容方子際明子瞻定之鄭子子金文仲

思道程子汝南亮卿思祈及有守從而蒞焉是日天

高日霽風肅氣澄策杖攀躋凌崖如躍移時跨絕至

止天都于是北望燕京東指日觀西矚崑崙南分百

越空曠宇宙瞬息古今命酒賦詩豪興逸發自邑起

執酒酌曰天都之峯鍾毓吾人今日佳遊結要永世

達甫其司盟詞有守載申言曰維天都之崇高萃靈

秀於萬古挺賢豪以億百侈茲游其不數矧風雅之

間作屬伊誰而接武幸並生於熙朝復同懷於鄉

土舒吟咏以飛迅凌蒼虛而濶步矢夾持於周行毋

顛隳其莫覩齊物我而一致追高調于三五豈崧嶽

之降神獨生申而生甫將皇猷以鳴盛導來許于

前路冀斯盟之弗渝庶申好于胤族

山史云此文氣度峻遠足與黃山爭雄

十六子詠

山史云溯結社天都去萬曆庚戌六十九年矣
惟方定之先生歸然獨存年九十有四其十五
人皆為黃土念一時社中
者舊典刑具在故并載之

王寅序云嘉靖壬寅予九日唱社天都峯下同鄉
合志而聲應景從者得十六人迺效靈運擬懷七
子延年詠頌五君圖性寫才可謂研真非遠矣若
夫造藝未定於今日隱見則分於後時此多有所
畧也

程自邑

諱誥號泔溪一號霞城山人

若本佐理資散傲避羈勒往來秦蜀都久憇大梁國
高價定李左靈嶽耀文墨歲暮旋舊廬對予獨中臆

陳達甫

諱有守號六水一號天瀛山人

從親宦秦晉追攀常與馬來夾持值賢豪陳情即風雅
韜彩固自深知知音世何寡坎壈欲素絲佯狂託杯斝

江廷瑩

諱璣號篁南

早歲負經術初聲有輝光沈痾臥丘園天衢阻騰驤
忿志養生暇九論營朔方明時豈終棄弱質今重傷

江民璞

諱珍號荆石

中歲慕不朽搖管多瓊鏐識洞道自獲室奧勞探求
伯也固機侶君乎亦雲儔獻策昔予並今獨先見收

余元復

諱震啟號東谷

縱游雜塵市閒居或忘櫛形骸任天真禮法畏桎梏
滑稽驚衆人而與曼倩匹登覽富篇童往往見清逸

汪玉卿 諱瑗號海洲一號古迂

少小薄簪紱執簡工文辭朝欲溟渤泛暮懷崑崙馳
匪曰卽能徃侈蕩聊自怡邇來悟蓮華香室一衲披

王子容 諱尚德號次海

群居寡談笑威儀勞羈束性偏任自然量易豈睽俗
著言雖未多瑯璞見良玉醉酒時清狂浩歌振雲曲

方際明 諱大治一字在宥號九池

出身綺繡場肆志投藝林草書錯鸞翥新詞希瑤音

仲氏昔同駕辟彼雙南金交存道易篤感逝憂難任

方子瞻 諱霓號龍門

擊劔非雄圖談兵恐亦誤千金購奇書閉關草長賦
折節升我堂薄劣媿陶鑄今游齊魯間刺滅竟誰遇

鄭思祈 諱玄撫號梧野

爾也貴公子服養甘淡薄千金視一毛丘山重然諾
錦錯袖中賦龍鳴腰下鍔婚嫁畢後時隨予向寥廓

方定之 諱弘靜號采山

年始十四五挾策游王都屢獻嘅不達歌詠聊自娛
王子孟瞻入室曹劉奮前驅况復性端靖藝德俱吾徒

鄭子金

諱銑號鄭谷

性靈甘齊梁要妙已能洞吐詞悉流風繁彩若彫鳳
貌悅非同塵抱獨自違眾酒德醉逾神連觴即枕甕

鄭文仲

諱懋坊號巾石

始駕鑑傍蹊中衢按六轡抱才既清新秉德亦和易
樂遊每獨醒歌對眾賓醉頌酒雖短章達言寧無媿

程汝南

諱應軫號熊耳

銳志覽百氏弱齡紫髯翁美哉玉為質温厚迴澆風
常攀會稽山題詩禹王宮德鄰固予慚才異翻途窮

鄭思道

諱默號南華

形容減彫飾披垢仍不全作意傲流俗高論卑前賢
百年畏非末勞心慕虛玄數來待我側授窺石函篇

自詠

王亮卿諱寅一字仲房號淮孺一號十岳山人

遠遊黃金空菽水給親養出入二氏間夢寐五嶽上
迂踈俗所嗤狂狷故多謗寂寥竹林居託詠寫悽愴

天都社詩

程誥

得五言古七言古一首五言律四首七言律二首

山史云山人臨河人歷游梁宋楚蜀終隱黃山所著有霞城集二十四卷行世

簪紱性非薄適與丘園宜無聞媿友生高臥慚明時
日予秉薄劣勵脩昧前期荏苒藝文場玄髮成素絲

諸君當年筭各抱貞瑩姿所志在不朽立言盛光儀
 謬枉同聲招夙乏三歎辭石也可為錯玉兮無瑕
 黃山頓起萬山之巔不知其幾萬仞兮根盤數州控
 千里三十六峰攢簇如蓮花中有天都巔岬挺出層
 霄裏游人望之輒奪氣安能勇曳丹崖履琪花瑶草
 目秋春丹膏玉髓至今貯於此浮丘鶴馭不能游容
 成星虹未嘗接引躡其址山靈久秘若有待人文孔
 昭殆天啟儲精應時產豪英藝林亘古騰芳聲僕奴
 命騷走叱咤氣勢浩蕩風雲征伊予丘壑風流者悔
 不十年早結社五嶽尋真骨未仙數椽卜築山應假

所嗤忽近務遠大探奇足跡半天下竹林竹溪相後
 先賦詩縱酒非徒然境因人勝我何有仁以友輔君
 俱賢攀蘿扱衽便長往倒凌絕景捫青天霞城深鎖
 恣幽討豈無累牘連新篇謳歌 聖代仗公等莞爾
 一笑忘形年

峰樹鬱空蒼雲盤鳥道長霞城開絕境陰火沸靈湯
 金液餘丹竈青泥似玉漿長生如可學于此事軒皇
 鳥健鳧疑化寇歆鵲欲飛石梯藜桂擁丹洞片雲歸
 金刹標三界青霞匝四圍招提開覺路結社願相依
 丹霄懸萬仞碧玉削芙蓉地軸超群囿天都見一峰

白光浮雨瀑青霽破雲松裊裊垂蘿裏摳衣此日

曳杖峰雲白浮觴野菊黃八風飄道氣九日集仙鄉

大宅芙蓉帳幽人薜荔裳踟躕來鶴馭咫尺度虹

境隔塵囂鷺嶺斜石溪齟齬不勝槎靈源香液飄紅

木仙洞祥光灼錦霞隱士淹留攀桂樹漁人惆悵失

桃花自甘半榻分雲石時陟諸峰掇茗芽

雲破諸峰爭出奇欲沒未沒青參差一壺貫得誰共

有雙屐借來吾適宜美芹不博鍾鼎味翹車肯載丘

園姿秋風吹我髮種種一笑白日天西馳自邑諸作殊草草

陳有守

得七言古一首詩不必入教以主社存之亦見先輩高風爾爾

山史云處士海陽城居棄諸生而攻詞賦年八十餘有集行世

天都高龍從倒影入寥廓俯視東南州山海等丘壑

三秋九日多涼風我輩游訪軒轅宮相將七尺龍鬚

杖披雲絕頂窺洪濛六七詞客羊何侶文彩凌駕建

安中酒酣呼招浮丘伯雲門笙鶴行相從天生我輩

幸同調追覽八極生雄風匡廬不羨白蓮社社中俗

客希禪蹤河洛不羨香山社社中酒客糟丘封豈若

我輩共環堵天都雅社開萬古東南高風振後塵奎

壁聯纏燭詩府英名八表追陳王文光萬丈齊白甫

江瓘

得五言古四首

山史云山人家邑之篁南以病棄諸生游吳楚殊有烟霞氣卒年六十三

嘉靖壬寅

新安古名都大雅久寥落群英應運興翩翩挺鸞鶴
白社盟素秋志意凌五嶽涼風盪織枯清霜掃嵯嶸
齊契熙淳懿觚翰時問作

作詩亦何為風雅良難追黃初恨尚淺大曆一何卑
游思翰墨園素衣已成緇同心結高唱不異竹與絲
性得暢玄覽聯軫登高堤

高堤一以眺茲山何其雄勢將九疑連浸惟百谷宗
自古饒仙靈遐恠世難窮我曹值明時况茲秀淑鍾
季秋理文裝鶴駕凌八公

八公豈易凌求道戒六丁平明登天都中坐視流星
光風爛瑤華玉樹何葱青空中來列仙簫管有先聲
長跪問大藥九籥啟丹經携手入無窮儻能度頽齡

王寅 得五言近體四首

山史云山人邑王村人產於北方有燕趙風謝諸生終隱王潭年八十餘卒所著十岳山人集四卷行於世

九日天都下相期駐鹿車澗萸垂絳實巖菊綴黃花
二八才人社三千羽士家溫泉真可浴一脈自砂丹

暮秋逢令節勝地倡詞盟競赴曹王駕高標陸謝旌
人賢昭盛代泉石暢幽情日日雲峰上如聞弄玉笙

共挺東南秀 同生桑梓鄉 熙朝結騷社 靈谷訪軒皇
陵氣瑤臺在 丹林藥竈荒 懷仙有長句 高詠欲鸞翔
攀陟栖蘭圃 煙霞散菊筵 因之集多士 不異望群仙
逸響俱鳴鳳 飛毫共瀉泉 陳蹤即俛仰 後駕慕前賢

江珍

得五言古四首

山史云季公為山人叔子之弟人以方二陸官至右使

弱冠學經術 佔畢攻文辭 古道久淪亡 俛仰內傷悲
諸君乘景運 藝林奮前驅 豈不希令蹤 駑駕焉能追
涼風彫木葉 忽焉秋已闌 天都鬱嵯峨 命駕相躋攀
龍山跡匪遠 風流異遊盤 行行拾瑤草 將以貽所歡

嘉會良不易 要結貴精誠 二三同袍友 譬彼松栢貞
嚴霜下秋草 始見歲寒情 還期金石堅 寧復榮虛名
桃李下成蹊 不為艷春葩 君子揚輝光 豈在紛與華
所志在不朽 實勝名乃嘉 願言崇令德 芬芳溢四遐

余震啓

得七言古一首 五言律二首

山史云公為余里人以貢官太湖廣文年八十三卒余少時數見之

玄嵯飛練凝 寒雲琪樹瑤 草揚奇芬霞 卮桂酒倒日
曛三十六峰標 人文綠筠杖 下紫芝滿朱泉 帶雨香
風暖星櫺月 宇青蓮開鄴下 風流此日來自憐 樊籠
繫黃鵠雲驂 遙駐天都隈 餐霞煮石桃花浦 鞭龍跨

鳳神仙府君不見五嶽三山元有主

白社廬山曲霞城黥水東幽情愜泉石逸興逐雲鴻

共溯黃初派還追大雅風欣隨三五友同醉菊花叢

飛鳥臨丹壑牽蘿度碧雲煙霞行處足吳越望中分

契結芝蘭馥游將鸞鶴群登高俱有賦吾此挹清芬

汪瑗 得五言律詩二首

山史云次公邑藂睦人早謝諸生有遺稿二卷其子重訂行之

天都接霄漢縹緲出雲烟九日衣冠集秋風蘭菊鮮

地開千載勝人盡一時賢蓮杜今誰繼相期共爾堅

青壁高千仞黃山第一峰芙蓉落天鏡丹腹耀雲松

石室留仙竈金沙駐玉容儻從軒后去白日駕飛龍

王尚德 得五言古四首

山史云公為郡諸生有聲與在宥方公皆刻意慕古而里中尤推公雅度超俗

佳節恣遨遊雲泉共臨賞覽物心已搖長歌發清響

天風何蕭蕭吹予度蒼莽中有冥寂士種桃及千丈

邈焉不可攀因之寄遐想拂衣起徘徊丹丘欲長往

步出北城門遙望城北岫千山入杳冥萬壑聳孤秀

眷言神仙窟夙昔懷未遘攬衣陟層巔解纓濯縣溜

翩翩鸞鳳鳴采采松菊茂所歡復在茲幽居擬同構

結屋倚雲端雲飛北窓裏坐臥有餘清往來無俗累

朝攀瓊樹枝暮飲玉池水未依鸞鶴儔且悟清淨理
種菊懷淵明草玄擬揚子鳥鳴何嚶嚶同聲以始終

少年學書劍三十名未成茲期住名山飄然以長征
人非金石堅安能苦營營眷我同袍友抱玉抗高情
玄風匪云遠白日猶未傾時哉不可失無為秋草榮

方大治

得五言律五首

山史云公老制科不第猶讀書蘊真閣終日
不釋卷余從汪司馬公叩之始一啓扉

弱冠懷名嶠登臨興未衰偶從高士駕同赴遠公期
地勝塵氛絕峰高雲物奇仙源行漸近應不負遐思
石磴縣青壁星壇倚碧空振衣千仞上飛鳥五雲中

地產三珠樹天垂百尺虹鳥飛疑不到猿度欲何從

九日龍山會秋風戲馬臺赤城金氣肅丹洞紫霞開
共結蓮花社同傾竹葉杯良時不可再相對重徘徊

憶昔軒皇氏尋真駐碧峰石函窺寶訣仙駕引飛龍
竈冷湯猶沸臺荒雲自封靈蹤如有待白首願相從

結構層霄上論文杯酒間松門紅日近桂戶白雲閑
江左遺風在黃初玉律還名山今有社千載孰追攀

方寬

得七言古一首

山史云

吁嘻懸山雄哉萬仞連天起四面盤旋一千里江南

百郡多幽奇胎分脉散諸孫爾最高中有天都峰尊
 居乃是茲山宗落日倒射暮光紫一枝獨挺金芙蓉
 九月九日秋氣涼携壺來訪神仙鄉我友相從十四
 五牽蘿度險聯冠裳星壇芝洞坐苔濕菊花萸實浮
 樽香茲峰勇往愁絕僻安能插翼凌風翔茲山不在
 嵩衡亞軒轅去後誰高駕我輩結社追雅騷題碑築
 室茲峰下只今 天子求詞人明時豈忍甘沈淪綵
 毫暫得灑松桂青袍難免霑埃塵汴溪子篁南生兩
 鬢久矣抱巢許之真情石牀蕙帳爾為守雲霞鸞鶴
 常逢迎早當解綬辭燕闕重來谷口毋寒盟

鄭玄撫

得七言古一首七言律四首

山史云

巍乎黃山之高兮不知其幾千里三十六峰根盤鈎
 連如相倚中有天都突出入窈冥仙人往來煉藥駐
 于此九月九日天氣涼秋風蕭蕭菊花黃高朋遙集
 泛霞觴放歌長嘯白雲卿仰攀絕僻凌穹蒼鸞車鶴
 馭相翱翔俯窺九州不可見蒼烟碧野森錯何茫茫
 夜來即借天都宿軒皇謂我等乃此山精靈之所育
 當初同曳煙霞裾今日還期共卜築容成子浮丘公
 一去青天鼎竈空桑田海水幾更易人生百年如朝

夕不能早聯六翮追雲鴻後來短嘆長嗟亦何益丈
 夫有生貴不苟常笑彭鏗為速朽黃金不惜買圖書
 要使聲名在身後羨爾悠悠三百篇屈宋曹王相後
 先蔓延李唐二千載隋珠卞玉如星連我生之辰何
 落落傷哉王風久不作當時爭說李何賢而今亦已
 成寥廓此道重衰難竟陳邀朋乃作天都行一時冠
 蓋搗山岳由來勝地產豪英予愧當年薄劣者相從
 共結芝蘭社上窺六府探幽玄下超八代追風雅狂
 來一倒白玉觥飄然兩翼凌風生漫書數字大如斗
 高挂霞州十二城

諸君逸思出風塵九日相期訪赤城木落山空秋欲
 盡天高雲淨雨初晴千年誰繼參軍駕萬仞金標康
 樂旌從此煙霞知有主共將歌咏慶昇平

同登絕頂望蓬萊萬里嵐煙一帶開黃鶴不隨黃帝
 去白雲頻引白衣來金蘭對榻開清宴珠玉揮毫盡
 茂才酒罷詩成興愈逸臨風為爾更徘徊
 憶昔軒皇駕六龍丹成飛去五雲中黃花滿地愁無
 極碧樹連天望不窮白日未能生羽翼青霄徒爾羨
 冥鴻石函儻遇容成訣一試金沙百煉功
 大都峰下繞雲烟白社遙連霄漢邊作賦擬裁今日

體登高還憶昔時賢
遨遊汗漫應成癖
散傲形骸任自然
十載幽懷今不負
同君長對紫芝篇

謝方弘靜得七言絕句六首

山史云司徒公嘗為予言生平未至黃山亦未赴社前詩皆送客之作并附入三首

青鳥飛來寄玉函
邀予同結碧雲菴
桂樹擬隨五老

採鸞車欲使兩龍驂
金闕樓閣開青宴
和正對亭

青天圖畫錦屏張
玉樹高風天路香
仙侶不妨千障

隔茅齋長寄五雲傍

霞城霜露日光寒
斗酒論文各盡懽
高思雲天吾獨

愧諸君綵筆早登壇

謝客尋山信所之
山靈處處助題詩
詩成盡是烟霞

色不啻芙蓉出水時

萬壑同趨天子彰
廣成丹室石為梁
雲門雲擁青藜

杖不道仙壇道里長

丞相源中香雨微
天都峰下玉芝肥
石髓如飴流未

絕他年來馭紫鸞飛

鄭銑得五言古五首

山史云

日月運天機
四時逝不返
惻愴情內傷
落葉臨秋晚
古人長壽考
託身每不淺
噫余奮蓬蒿
眷此何由展

朋故償夙悵結社棲靈嘯千仞一振衣深情付所遣
 束髮懷五嶽畢婚尚遐期閱圖探名跡慕遠近多遺
 茲山何其峻六六挺靈姿天都中迥出不與眾峰齊
 軒皇肇奇蹤群仙萃於斯我來尋藥鈔延佇掇丹莢
 長謠昇天行何以慰相思

相思不可見悵望還登陟九州一瞬前峯萃猶未即
 攀蘿躡浮雲凌空羨飛翼天天紫芝榮燁燁瑤花絕
 雙雙白玉童燦燦黃金室我行今見之群仙汝應值
 群仙胡為者浮丘容成公知我峰上游先期駕飛龍
 天台對面起石梁遙可通朗詠廬山謠緬懷康樂蹤

若人不可作伊予將誰從千秋結遐想浩歌凌長
 永日恣攀陟名奇猶未央明霞朝可食開襟浴靈湯
 眷茲良辰會采采菊花黃登高送阮嘯促席飛陶觴
 諸君富華藻累牘連珪璋慙予若懷素黽勉徒徬徨
 白雪誠獨難下里焉能藏

鄭懋坊

得四言古三一首五言古二一首

山史云

心星在天時維季秋蟋蟀悲鳴熠燿宵流晨光迅邁
 何以忘憂駕言郊麓以遨以遊
 爰登黃嶽笑傲天庭唱酬間遞會不暫停仰慕舞雩

俯契蘭亭先民有作千載儀形
 載馳載驅于彼原隰絃歌繁會和樂既翕譬彼龍升
 慶雲畢集中心孔悼每懷靡及
 二耀麗乾坤周旋相嗣續江漢無迴波秋草不重綠
 人生寄一世貴得從所欲聊且蕩情志散步天都曲
 凌雲游太虛翱翔出塵俗

杖策尋幽壑陟彼黃山陽攢峰出浮雲古木鬱蒼蒼
 涼風發清響白日耀朱光高詠暢幽懷歡樂殊未央
 願言重交誼沒齒毋相忘

程應軫

得七言古一首

食非同

山史云

巍乎遐哉茲山之奇崛兮霞城週迴八百里群峰秀
 拔煙霧冥根盤鈎連互相倚軒皇龍去丹鼎空愁絕
 人間學仙子鹿車鸞驂杳何處扳岬躡磴徒爲爾骨
 凡自信非仙才誰見懸壺日中市乘雲何由覲帝鄉
 攀桂無勞招隱士洞簫吹徹綵雲生八翼天門飛不
 起蟠桃結實幾千秋彭錢八百爲速死君不見天生
 我才信非偶欲使英名播不朽安能玉食游皇都何
 用黃金高北斗應須盡載書五車與君結社棲煙霞
 投入錦囊人莫識問奇還過子雲家

鄭默

得五言古四首

山史云

代謝如鱗次三秋忽已闌
 白露凋群芳飄風肅微寒
 逍遙軒轅宮矧乃集所歡
 舞雩去已遠玄踪今復
 携手登雲峰列坐臨危壑
 朱醴苦行遲陽阿時聞作
 願言常歌笑恣我心所樂
 母為懷異心劣終義所薄
 南望天台阿北眺大江
 湄浩歌相旅酬娛樂未云疲
 諸君多遐思粲彼朝霞輝
 僕質信鴛鴦鈍匍匐焉能追
 寒暑迭相承日月不遑處
 清時安可常嘉會復幾許
 眷我同袍子契義徹心髓
 齊聲奮逸響今聞播遐旅

黃海

卷第

天都逸史潘之恒景升輯
 印石主人吳際明應圖校

紀游四之六

遊黃山記

江瓘曰黃山為東南雄鎮盤據宣歙二州之境嘉靖
 壬寅秋偕諸友嘗一遊焉然幽遐倬詭之觀未及領
 畧戊申春余過青陽度箬嶺黃山在望逸興遄飛二
 月既望歸循黑溪訪道里於途人遂促駕往陟嶺東
 南行數里至皇思蕩纖雨霏微又數里至烏嶺並黃

山行陰霾倏收攢峯駢列橫絕天表登頓忘疲自黑
 溪四十五里達湯口平原膺膺阡陌交通遭丈人程
 子暉一見如故交延入溪樓雞黍款洽盡歡而別遂
 肩輿入山亭午抵祥符寺迺有羅子尚綱方子叔玉
 路子子美藏修山房賓主禮成結伴偕往風雨凄其
 登臨興阻日且脯聯嵐含暉仰瞻諸峯紫翠如沐羅
 子曰此晴占也薄暮山僧秉燭陳俎澗毛野簌雜然
 前羅行酒側數更闌乃罷醉宿繩牀夜聞泉聲潺潺
 疑在巖灘富瀨檝舟枕流八明鳥聲圓喙旭霽激
 鮮亟呼童裹飭治裝偕羅方二子從者七人二僧明

章道常携梵樂與俱登山可半里許薪蒸蔽衛乃戒
 一僕前持斧斤剪伐叢莽一僕鳴金繼之二三人肩
 糗執劍戟以隨斬木為杖約四五里許至一峭壁巖
 巖陡峻鑿坎以託足曰天梯好事者為木梯倚崖壁
 歲久而朽心甚危之前導二人遂扳援先登復懸組
 崖巔之樹以為援曳迺各解衣棄杖羅子引繩而先
 予繼之方子又繼之乃緣崖而左百餘步幽壑谿訝
 疑不可越有二木貼崖若棧僅容武而度下臨絕壑
 未敢俯視山史云當時之險如此乃今阻絕益可知矣且以得海子無暇及之山林顯闕亦自
 有時折左紆逕可半里許蒼崖業薛有洞穹然飛泉

灑灑落洞前爭然如鳴珮環四時不絕曰水簾洞水
落輒滲下不溢洞深可三丈高二尋廣稱之洞徹裏
崇一級二尺許復敞一小洞可羅胡牀四五居之然
嵐重晝日常黯黯二僧坐洞門歛龍箋擊鼉鼓疑入
鈞天帝所僊僊如也洞石黑白相雜瑩潔可愛蒼苔
翠鮮爛如綺繡坐洞裏歌嘯聲如出瓮中洞前群峯
聳峭効竒獻秀冥坐移時淒神凜骨不可久棲出洞
循崖而左十餘步倚崖斜開二小洞高深廣邃視水
簾半之時有高霞孤映曰餐霞洞有荆扉竹籬石牀
丹竈相傳練性苦脩者居焉迺與二子浩歌長吟摩


崖紀石方列坐而麻時天風蓬蓬聲動巖谷崖上古
木倒垂冬夏常蔚然上有丁公菴菴圯而基存聞猿
狖所居豺狼所嗅榛莽留翳莫敢爲之導者少焉陰
雲突興峯巒滅沒疑有雨意復循故術而下至天梯
挽繩緣磴幸抵其麓猶惴惴不自禁道常梯半歛篆
念法華如履坦夷嗟亦異哉抵寺日猶未昃擬尋湯
嶺諸勝而羅子告疲莫能從矣乃強叔玉子美以行
出沙門過觀音殿穿杉篁躡石磴折而東下巨石蹲
礪澣若門青樹冪陰藤莎絡蔓水灑灑循礪鳴有靈
泉自朱砂峯來湫爲二小池池皆瑩徹上池廣可七

尺深三之一泉出石根恣恣不息若燔湯遂解衣試浴織垢靡停令人神瑩體暢或云澡滹可祛宿痾理或然哉池上甃石如洞以便風雨來浴者池左丈許石壁如削有元鄭師山今郡守馮遺刻左由石徑而上群峯夾礪峭立多桃李梨杏檜榭榭望春諸花搖颺葳蕤草則蘭芷芷蕙赤箭青芝紛紅縵綠翳香勃苾莫可殫述南行里許叢石怒撐交加澗曲懸水傾注漚而為潭潭幅圓廣可十尋清潔可斟黛蓄膏渟有白石鱗鱗橫潭底衝湍動搖若龍起伏使人目眩心掉能出雲氣作雷雨曰白龍潭懸崖劉龍潭二

大字亦鄭師山篆也潭北半里許為藥銚坑有石杵藥臼相傳黃帝燒丹處云出谷里許有石如虎昂首咆哮之狀疑若搏噬相顧駭愕退却石下有巖傍有罅人偃僂穿之行可容數十人曰虎頭巖又半里許有石如人酣醉石之傍有泉淙淙走石壁而下為洗杯泉下有伏石為坻為嶼為島石色陽白而陰黝如停雪之狀曰停雪石過雪石入谷行剛半里有泉深然自懸崖直下勢如游龍飛虹雪翻谷鳴注而成科坎者三盈科復下衝激而成坎者五曰落星泉山史云即今嶺谷折而陁有巨石倚崖拆裂為劍石又五里陟

湯嶺巔時日在西禺遼廓眇忽邇延埜綠遠盪天碧
 九華排空出沒隱見岡原林麓田疇墟落秩秩如畫
 延停久之歸途期復坐龍潭一條塵襟不覺乘風而
 過迷其奧區矣曉起與諸友振策登鉢于孟峯童童赤
 崖無大草木巔巔攀躋約三里許至一峯仰視聚峯
 猶在霄漢又八里許始躡鍊丹峯過仙人石橋酌丹
 泉徘徊瞻眺尋藥爐丹鼎幻化莫知其所幽禽異鳥
 若歌若答衝人不飛俯視千峯萬嶺皆在其下而仰
 瞻天都卓絕雲際如方躡其麓問之明童云上多名
 藥採者裹糧以上三日可達其巔雖逸興飛揚而鳥

術如線徒臨峯翹望而已迺與數子引觴滿酌發狂
 大叫蒼然暮色灑氣迴合放謔踏月而歸再信祥符
 寺謂諸友曰茲游豈偶然哉與若鶩遠臨危搜竒發
 秘雖靈運廬阜之遊孫綽天台之登未或遠過也山史
云孫未登天台乃遙賦之耳宜更作夢字凌晨別諸友促駕而返八里許
 至湯口程子復邀飭馬為譚巖洞峯巒之勝程子曰
 山川瑰詭此特其百一耳秋高木落風御重行暉當
 與子前驅窮幽極遐可虜復揮觥縱飲牽裳道別薄
 暮投宿楊干之旅舍隔岸鳴鐘迴風送瀨猶疑水簾
 之泉祥符之景也次日向午抵家霖雨連日迺徵山



原件短缺

卷7

靈有相之者竊自喜聽雨抽毫志其大槩或可資來者之旌鏡云

山史云敘水簾洞白龍潭甚奇至鍊丹峯彷彿得一二耳雖能文者非親覩其勝烏能文哉

游黃山詩

江瓘

游祥符寺

叩梵披靈磴探幽陟碧岑靈泉堪試浴紺殿下春陰
帝子遊何處丹爐雲正深未須談浩劫懷古一長吟

黃海 卷第

天都逸史潘之恒景升輯
鄰虛居士潘膺爵尊生校

紀游四之八

黃山吟稿

方大治記曰江南諸山之天者曰天目天台稽其郡志高一萬八千丈我黃山復出二山之上不啻數千仞以地連宣歙控江海之上游也疊嶂峻嶒隈隩嶮澁道理幽遐車馬罕至游者艱之予與友人吳子荆良琦締約有年乃於是歲三月折簡走使曰時維春

暮景明物熙子曷奮往以踐斯言琦別業在茲當爲
主人以俟君來乃於初四日伺於楊干精舍之側俄
而子荆偕其姪祿至車服洵都僕御環匝相與杖策
登陟飯於觀田過碣石嶺陂陀繚繞岡磴逶迤灌莽
交加杉松葭稊迴視故鄉風景頓異嶺盡有小溪亂
石參差水聲激洌中布平地遂爲邨居謝氏子中家
此應留宿晨起聯轡歷曹溪屆大聖山麓入太古堂
登來鵲樓皆吳君克思所構者子荆出新茗同啜解
衣盤礴得暫憩焉亭午片雲翳空煙霏乍起纔至山
之小亭驟然雨下張蓋乃陟其巔謁普祐院院左有

元時石刻盡以斷泐青靄漸收群巒點黛出寺南望
雲門鉢盂峯如在雲霄之表過期鳳亭綠竹森布枝
葉檀欒碧色可染山僧云煙火寥絕得遂其生與市
寰迥別因語子荆夫以一物之微所居離垢尚爾不
群吾人若能棲遲靈丘蟬蛻埃壒其養生復性得全
其初當如何耶是夜值秣陵信上人先至率其寺僧
容誦楞嚴至宵分始已詰朝凌翠微穿叢薄達于香
溪度盤雲嶺欹側宛渾巘嶸龍從喬木枯柯交塞徑
路披襟解帶勇出嶺上上有洞可棲拱立其中三十
六峯盡列於前如揖如踞如走如止時天氣晴朗山

光淨洗窪奧閔深毫髮盡覲獻巧售竒應接不暇此
 非天下之竒觀也耶由山汭至竹溪僅五里許遊丞
 相源鳥道詰屈蒼莽密翳幽香杳藹草色阡眠藤榦
 攢羅徃徃胥人巾袂路斷復聯輻輳以木已越山椒
 俛視百丈飛泉直瀉崖下下注深潭潭渾有九或方或
 圓殆類鑿成水色澄虛澈底深碧漸至其頂潭復在
 下捫蘿扳衽不覺登茲源之上上有地一頃闢之以
 田建屋數楹為吾鄉王童諸子藏修之地遂假館炊
 爨具殮弛擔於此飯後子荆命二樵者導夫前路伐
 木開徑遠凌險阻兩山夾峙澗水奔流巨石齟齬異

木蟻蚪愈行愈幽未窮涯際忽見坡連突兀封鎖若
 緘而雙崖斧劈劃然中開桃李玉蘭諸花綽約芬芳
 香氣襲人鳥聲不入如此奧區殊絕人世乃與子荆
 展觴布地飲盡而起復臨一洞石蓋如屋中甚虛豁
 可以張筵洞之左黝然深黑入其中獨開一竅光映
 四壁徙倚逾時題名石上而出還至館所則峯隱半
 規月已東上矣曩子荆題石曰醉石大書深刻平正
 軒豁可容十許人設酒榘于上仰對皓魄俯聽流泉
 歌李白吳會之吟談軒皇鍊藥之事酒酣與劇握臂
 為盟咸以他日婚嫁甫畢遺落世氛結廬高臥當無

後期白石清泉爲我印證左鄰天都僅踰咫尺日出
焚香盥濯恭謁茲峯歛容再拜舉酒酌之曰追憶疇
昔與程自邑鄭思祈十五子結社於此自今觀之已
爲陳迹山靈相予默啓乃衷母爲茲峯羞徘徊悵望
不忍遽別仍存舊路須臾至山下過芹嶺冒雨入祥
符寺夜深如注昧爽稍息欲偕游侶出沐湯泉先役
侍者六人更遞以守池口恐其與衆混淆也午後釋
巾舄浴之池長丈許而濶半之水底蕩沸漸湧浮漚
澄清瑩徹照見沙礫氣蒸蒸芄芄若鼎鑊然最爲竒
絕池之右石壁蘚封稍拂拭之見吾大父雪舫翁題

名其左則元鄭子美舊刻宛然如新東折循級而升
蘿磴盤雲晴厓飛雨丘壑中斷清波湧出木梁圯仆
負而渡之立白龍潭石上水勢淖滴咆哮怒號雪浪
競奔聲振林谷恍惚有游龍潛據其間欲作霖雨之
象轉盼左壁瀑布千丈蜿蜒直下白練騰空所謂朱
砂泉是也外有朱砂峯則閃閃冥冥莫可模擬由龍
潭而上至藥銚坑舊存軒轅石臼新雨夜漲汨沒水
中隱隱微見其迹里餘怪石突出若於菟雄據號虎
頭巖子荆沿其傍採擷茗芽自製同啜歸寺雨聲更
甚徹旦不絕淹留方丈鮑子有邦讀書其中把酒論

文晤言竟日翌旦稍霽復攜壺榼游丁公菴山路巔
絕苔濕滑膩勉力至水簾洞而俯瞰下界衆山若埴
溪流如帶舉頭指菴真在天上子荆執手語曰僕性
僻嗜竒昔韓昌黎登華岳不能下輒大慟竊欲効之
子勉焉時天氣暝晦山靄霏微中道而反留連馬蹟
石締觀軒轅碑率衆下山日云曛矣乃宿于湯口程
君時雅好文士偕其姪柳迎之於家殷勤款洽雞鳴
月落起戒輿人束裝東首與子荆別茲晨扶光曛隴
清霜滿地墟落蕭疎林柯夭矯乃循堤沿岡水與山
轉溪僅容舳巨石磊砢激流有聲遠聽之有如環珮

越三嶺渡容溪俯視諸鄉巨細畢見始信吾徽在萬
山中未游黃山又何以知其勝也尋楊干舊肆沽酒
自酌因憶子荆昨會茲地今成獨歸殊覺悵惘是游
也雖際暮春而山中氣遲花香滿路間遇陰雨力疲
息駕游興未淹况值主人之賢搜竒語勝纏纏不休
得以周覽偏觀此非良覲也耶歸誇之鄉人何憚而
不往也昔柳侯謂以永州小丘置諸豐鎬鄠杜則貴
游之士爭買而不可得夫永古爲遐荒以茲山校之
則小丘邈乎卑矣柳侯猶然竒之世人匪特不售到
之尤難何哉懷安而惴險遠慕則近遺也顧乃語人

曰我將遊五嶽此誠漫言耳其遐邇勞逸又何如耶
予得縱覽茲山不欲自悶遂覩縷其勝以誌夫後之
人遊九十三日賦詩雜體共三十一首隆慶三年季
春日

黃山雜詩

方大治

楊干寺遲吳子荆同入黃山

惠風蕩纖翳扶光射郊原凌晨陟陁峴倚杖度荒村
突兀出樓閣竭來不二門蒼蔚露霑幕掩夢花盈園
想見賞心人延佇駐高軒傾蓋暫班荆矯翮思孤鶩

豈惜路彌遠但欣約弗諼攬勝自茲始良游瑩心魂

過碣石嶺 此由曹溪道

躡屩千盤上樵歌半嶺聞叢林籠宿靄曲磴裊飛雲
碧樹侵衣密黃山隔隴分此中多野鹿羨爾自成群
來鵲樓茶會

名麓開雲閣松風背日寒鵲喧知客到花落見春殘
池滿魚爭餌茶香氣若蘭相逢多樂事詎謂道途難

雨憇聖山亭

雀馭翩躚興欲狂雙飛鳧鳥度丹房春堤花柳增行
色峭壁風濤掩日光天外松峯青靄合亭前蘿逕綠

雲長樓臺隱隱迷烟樹振屨還須到上方

宿普祐院贈隆上人

名山初發輒獨扣遠公扉月影穿蘿壁鐘聲徹翠微
竹外峯偏暗林中花自飛夜闌禪坐久何處染塵機
盤雲嶺上對三十六峯

盤雲嶺高挿天千巖萬谷相鈎連三十六峯當眼前
東風駘蕩遍八埏瑤花琪草長阡眠霽旭搖光慶雲
爛中天積翠巍峯圓軒后靈宮眇何許浮丘鍊藥非
虛傳一丘一壑盡呈巧或俯或仰相資緣屏風九疊
布雲錦諸孫羅列何喧闐耳目應接心茫然便欲凌

虛陟其巔安得王喬雙舄化揮手青霄招僊侶日落
徘徊暮山紫臨風搔首詠游仙

香溪

沿堤一帶綠揚齊雨後繁枝壓水低怪底林端盡香
氣落花片片渡前溪

題呂叟屋壁

深林能選勝谷口狎漁樵雞犬孤村寂烟霞曲磴遙
茅齊連水竹喬樹入雲霄霽合常飛雨峯高易鼓颺
占時知甲子觀象數星杓地僻車聲絕心閒習氣消
未能逢石體且欲效鷦鷯化俗人稱美刑家世作標

力田思並冀鑿井已忘堯大隱雖云邈清風未可招
自嗤闖闖久蘿逕坐相邀

百丈潭

東風歛夕霏山色靄晴暉天上銀河落潭邊白練飛
春林啼鳥絕危磴採樵稀已冒垂堂戒岡頭一振衣
月夜同子荆醉卧鍊丹峯下放歌

鍊丹峯高水出早風吹石上淨如掃半輪皓魄落杯
中照見鬚眉吾已老攀蘿扱衽峯之巔共挹清流枕
石邊千年喬樹扶踈影百丈懸河瀑布泉春風飄飄
振芳甸終朝不見流鶯囀山深氣冷花始開故園花

落今如霰良遊笑我常蹉跎冒險探竒君已遍相逢
行樂共流連瞥眼浮光真掣電君不見容成子浮丘
生昔輔軒皇大藥成崑湖那免龍髯折空遺世上神
仙名神仙安得至今存不如對飲罄清尊千仞岡頭
頻岸幘萬物芻狗何須論歷盡群峯丘壑美此中自
有一乾坤

宿天都諸子結社處

二首

危峯何崔嵬去天僅盈尺雲霓翻在下象緯可捫摘
三春無鳥飛一逕稀人迹翕赭洞口霞暝曉水中石
揮手凌空蒼條然生羽翮締觀結社處蘚花封繡壁

歲遵蹟易湮人存事靡敦披榛物候新于焉鍊金液
其二

尋雲靚青厓瑤草正葱蒨邈眇盡綠疇泉流渺如線
遐恠心魂驚冥搜耳目眩陵谷昔逾新詞壇詎終變
鴛姿謝纒牽睢渙長游衍燕石厲荆璆精金資百鍊
譬彼茲峰高群巒未能先蹇步杳難躋中霄獨深眷

石澗玉蘭滿林賦詩賞之

深谷名山何處移森森玉樹媚清漪國香漫擬倚蘭
操秀色還同冰雪姿山氣疑寒開獨後靈根穿石意
偏竒與君採折充瓊佩獨笑傍人應未知

仙人洞晴眺

寂寞仙人遠空留此洞名雲扉晴旭射石竇彩霞生
杜若迷芳逕蓮峰接化城藥苗朝可採丹竈夜還明
控鶴何年至攀龍此日行入山尋石髓作賦愧金聲
嘯響層崖合波廻曲水清浪遊忘地險玄覽覺身輕
延佇吹簫侶相攜聽鳳鳴

祥符寺雨

古刹霾朝靄前村起暮烟翠屏行處斷丹壑望中連
攬秀淹雙鳥談空謁上禪妙香清遶座梵字本從天
况嶺飛泉遠拈花杖錫旋青鞋依慧境白足渡迷川

欲述游山賦先成苦雨篇

水簾洞望丁公菴

巖岬層巔散紫氛三春淑氣自氤氳晴崖不斷四時
雨風袂常隨萬壑雲曲澗奔流林外遠迴峰夾峙望
中分遙瞻絕頂青霄上倚杖歸來日已曛

浴湯泉

溪干纔被襖點水復來遊令節逢三月名區隘十洲
層巖開絕壁曲礀繞清流温火湯長沸陽光燄欲浮
跳珠澄澈底濺沫聚成漚一線通舟溜千崖落碧湫
昔人能點茗今我共傾醅解帶寒風入開襟暮靄收

濯纓歆鶉弁漱石枕雲丘十載迷塵垢于焉豁壯眸
留連甘露境從詠未能休

藥銚坑

二首

黃帝大丹成白日騎龍走石曰恍如新仙踪今在否
絕巘擁孤翠飛流春正長遺得金光草時聞藥銚香

雨後過白龍潭

急雨鳴雷新水生潭邊昨夜有龍行一泓飛瀑衝濤
雪萬壑奔雲映晚晴鷓鴣變聲松裏現瑤花弄色澗
中明春泉况值波流瀾正愜遊人濟勝情

朱砂泉觀瀑布

黃海
方詩
雙瀑斜飛聲怒號游龍百丈濺波濤峭壁烟嵐晴作
雨砒厓轉石玉爲膏竈梁萬仞徒聞險鷺積千年未
足高杖策來游正三月百卉芳菲仍未歇昔聞洞口
丹砂流今見源頭芝草發屏風疊疊陵紫霞曲水遙
遙度溟渤石臼瀰漫翠靄封靈丘窈窕神仙窟銀漢
橫空映碧湍綠蘿裊磴蕩春寒倒流何似三峽水直
下定走雲門灘山礪砢水潺湲令人對此開心顏一
笑深山未忍還

虎頭崑子荆採茶同啜

險峻經行慣危崑詎易過澤蘭漸被徑山茗已連坡

路僻竒遊少甌香雅韻多自能除宿垢同卧白雲阿

馬蹟石閒步

四首

谷口翳松蘿此是仙源路不聞人語響遙聽踈

鍾度

仙駕耿難追誰是殮霞客如何峰上人空遺馬

蹟行

六六青芙蓉烟光乍明滅不到諸峰遊那信靈

區別

隔石纔咫尺同駐軒轅碑空山絕行迹芳草自葳蕤

湯口與子荆別

二首

十日隨君豁遠眸共攀絕壁與丹丘春風踏遍神仙
路翻笑桃源只暫遊

歸來歷歷見重關山自縈環水自灣若道群峰遊未



原件短缺

卷9

黃海
盡何因滿袖白雲還

容溪道中 三首

地勝峰俱北山迎路漸南迴看烟霧合似起白龍潭

峻巔遊已遍策馬返平皋覽茲綠疇濶轉見諸高峯

清流環碧嶂翠柳隱丹萸留連忘去路斜日在林西

黃海 卷第

天都逸史潘之恒景升輯
巖棲居士潘膺祿幼廉校

紀遊四之十

游黃山記

汪道昆曰新都東出叢山關表天目西蟠白嶽表九
華南峙三天子都靈山爲表由大鄣畧林歷直北而
表黃山乘傳者率東西行南北則否所部倚辦司理
比歲周行列郡中會計吏入朝司理兼攝郡縣事日
多暇則就余稱詩且進余二仲及潘生會郭山人次

甫見客乃就東郭宰白榆社屬余長之其地錯部婁而屬斗山蓋聚星之義也畢計得代司理將泝秋浦歷姑孰而抵吳門余謂由黃山徑青陽去秋浦差近卽架阻寧令車轍避名山司理以爲然請受方嚮其駕中權奉長者宰請舉社以從適閩二客與俱召善琴者許太初載之後乘余爲之部署定程期一息而宿竹魚庄主余近屬再息而信冷風閣閣在嶺中是爲余避詔所棲主余妻黨三發至矣止軒轅宮期至余帥六子先次竹魚庄司理越宿始行日中至則云東門氏相矣郡大夫相帥及相門重以尚書期後長

者約新暑甚未及啐酒亟命徹之薄暮席堤上亭一艇繫垂柳泊堤下乃命漁人進艇舉網而漁有獲輒烹鮮急呼酒酒至而日入矣燭始跋宿閣中蓋垣外老梅一枝踰垣而拂西牖是爲梅花閣閣東小閣一東牖與修竹隣窻戶洞開少焉月當天而入臥內余披衣起旋聞中閣履聲俄而群囂起垣一方尋復寂寂詰旦知余宗漢夜呼酒主人惴惴毋譟相君夢游宗漢屏氣語曰主人勿憂憂則亟以狂藥啗吾口耳疇昔人各分詠旦以爲期旦日遞成獨莊靜甫後二三子靳靜甫遣一奚倚戶趣之靜甫大呼曰司理三

尺謂何馮子都窘我甚且殺我司理以期會先發余
徑行次二仲景升挾宗漢從次太初挾次市靜甫仲
淹負方太古龍鬚杖挂僧大安長生瓢至容成臺余
宗人持酒遮道二仲謝曰日旰矣少留且觸熱將不
堪宗漢躍然曰帝遣容成氏勞賓余天孫固當飲首
舉瓢而醕者六遂袒跣就車次甫故習酒家屋後鑿
池方丈垣外通流水畜游魚數十頭則與靜甫太初
臨觀指巨者曰吾所欲也褰裳持小罍既獲就庖烹
之余先抵饌中司理進次洽舍宗漢不衫不履臥車
上揚揚過之群小兒堵觀曰客何爲仲淹語曰故全

椒令也皆拍手笑曰胡令若是抑鳳雛邪向夕相率
至饌中司理既及下車諸將乃始嘗食司理怠而就
寢無用餐宗漢被酒深臥華陽館日高春始起匿樛
木亭日課詩未成當法酒司理笑曰瓢飲具在吾其
爲君解醒命一奚餉青梅強之盡宗漢呼曰何物孺
子曰殺一人而後饜主人請流觴具曰可司理及余
先至踞石而引二觴衆未及行雨集皆反主人遞進
舊醪悉苦其甘將易之舍中日暮塗遠乃罷酒蚤起
畢發余以目眚獨留至則息駕叢林薄暮就湯池浴
浴畢將據高石行酒禮曰進襪山人力止之毋深入

虎穴司理笑曰嘻太甚山人固畏山君耶乃褰涉中流爲河朔飲酒益進失山人於是篝燈入軒轅宮候吏屬沙門治具酒甘如嚮者客益苦之詰沙門曰若飲乎曰飲曰若飲能辨甘苦乎曰有如澠淄客正色曰佛法無飲若飲固當藉令辨甘苦如澠淄宜必以不甘甘吾黨乃今吾黨苦矣何居沙門故戚戚若無所容聞客言顰蹙益甚仲淹爲之解曰客酒禪也旣知酒且知禪沙門則禪酒也彼不知禪焉知酒客休矣司理語宗漢令君故豪乃今何默默也宗漢謝曰翔故任天放日飲而醉二參假令挾日一吟猶懼不

給乃今程督如功令苛急如催科翔有裹足而逝耳夜分而寢門外聞虎聲司理笑曰異哉遂中山人之億質明導一比丘探故跡先白龍潭故游者率登釣臺下視不測比丘言此摩頂耳第以踵觀乃循石磴而下臨淵蹉踔不能以步至則大呼奇絕司理賈餘勇從之挾二騶奴扶掖而下進寸退尺無慮三百步而始息胝衆目難之二仲攝衽遁下山人左顧而語潘生曰此有竇吾其爲長房氏毋爲伯昏無人竇三折而響三垂出就砥石臨潭上平裘視釣臺等衆纍纍下就坐命太初鼓琴仲淹笑曰其斯爲龍見乎見

者吟則潛者否矣泝谿而探丹井得之中洲井故弁
口而淺中舊名仙曰余昔游而窮其底底若螺旋而
始窮五色卵壘中央粹白者不啻珠玉井深七尺率
天成無斧鑿痕明發水溢而清泠余署曰丹井司理
至而一軟屬仲淹嘗之進次虎頭巖下溪流沿洄石
齒齒出鳴瀨間疏蹙如列坐山人憶罽中事請復流
觴司理據高坐先登餘悉就坐則自上流浮大白隨
所至輒引手取之水既平風四面至汜汜若虛舟耳
司理自高而垂手徃徃止而復行獨一巨石當匯中
集如白鳥宗漢揭而徃吾固當爲海上翁狎之觴無

留行徑醉矣遂拊石而歌曰醉石粼粼吾當抱此以
自沈更進則片石黖然飲水中蒼蒼作龍鱗出沒狀
司理言自黃帝御天稅駕於此化而爲石蓋吾族類
也遂署曰鱗石命工鐫之余自罽中置詩郵至與行
會司理喜動顏色語諸客曰吾適批鱗輒得領珠三
十六峯之上猥云象罔寧足當三百六十長乎更進
一石衡水上如琴水清激如撫清泠視丹井勝司理
復軟之于是奮衣登危將以一瞬而窮萬狀過半而
風雨至踉跟還故宮余聞司理明日遂行力疾無程
而入中道遇宗漢益負責而逃至則出諸不虞倌人

駕矣司理出篋中詩歷歷談諸勝事余俛仰周視若
 已再升于是司理品境內諸名山此焉舉首白嶽一
 魁父耳直以近人而奇蓋剖劂雕幾之為適足以悅
 衆庶黃山高矣深矣闊且遠矣卒然而至百無一奇
 如將窮四極覽八荒非羽翼不可要以束高天而蟠
 厚地吐雲雨而吞三光猶之特室合宮人力無預警
 乎大矣雲門一閭闔也啓閉則豐隆主之天都壁立
 而出九霄無贅附無陂陀甚則飛鳥不能度猿猱不
 能躋視西嶽四方尤為卓絕龍潭深三十仞空明可
 察秋毫假以日力而窮其源則一木皆析若也一石

皆支機也猶之木處草衣汗尊土鼓脫芬華無所用
 之千古寥寥足音罕至賢者則邑人鄭玉顯者則郡
 大夫馮世雍近則程太史敏政張納言寰周太常怡
 羅太中汝芳三四君子而已乃白嶽之輶軒相接軫
 胡為乎去此取彼哉余曰固然此其一隅也折而西
 北為丞相原九龍潭最勝匯則九澤遞高下則九階
 飛瀑則九旒英英出雲若列九賓而陳九鼎奇之奇
 者也暑矣宰公行矣胥後游此其近者也余嘗登三
 天子都崇倍有半振衣決眚僂指可盡東南南國畢
 宗黃山此其祖也往余以十月至聞龍吟舉酒酌之

浙將再往暑矣宰公行矣胥後游司理謂膺將挾山人游九華山人憚暑不可茲由天目度震澤庶幾一登余攷圖經天目之顛僅及黃山之趾此其苗裔不量可知里社翹足以待宰公暑矣宰公行矣亟歸矣于是司理謝客從僕受綬以行

游黃山詩

汪道昆

字伯玉歙人官至兵部左侍郎有太函集一百二十卷

奉枉龍相君偕同社宿竹魚莊

相過近屬卽吾廬更集良朋奉路車坐上薰風陰洞滿林頭涼月夜牕虛題詩竝占淇園竹舉網深求丙

穴魚醉客中宵呼酒急獨醒那怕惱三閭

望雲門

赤日曹騰鳥道昏丹梯縹緲帝居尊正逢積翠開雙闕好附飛黃謁九閭天遣巨靈從此擘地留真氣至今存銅龍有意求仙訣金馬無能答主恩

望天都

一峰卓地插中天獨立亭亭出岳蓮老鶴青冥迴戍削孤雲翠壁費蠻緣高標牛斗懸河鼓俯視兒孫捧御筵瞥見王喬披綠髮相邀帝所聽朱絃

湯池

初服飄飄脫芰荷玄都湯沐接天河靈源細引丹砂
液神瀆潛通赤水波玉女洗裝扶曉日羣仙晞髮逼
陽阿上池池上清如許一濯塵纓鬢已皤

白龍潭

懸厓曲磴釣磯懸下見滄浪倒接天潭底龍宮三十
仞雲中帝駕五千年連山燕石乘風去徹夜驪珠抱
月眠泓下孤吟如有意曾從魚服識重淵

九龍潭

摩天積石迤靈湫客子尋源到上頭吳楚江分雙擢
髮軒轅宮近九垂旒昆侖西北星連海瀑布高低漢

倒流忽漫盤空雲氣合羣龍應奉帝車游

自黃山歸白社奉懷司理公

帝揭神臯自古今君紆使節一登臨揚眉已著烟霞
色回首猶聞鸞鳳音六郡壯游炎海近孤城高臥夏
雲深滄洲處處人間世白社應知吏隱心

龍膺

字君御武陵人時司理新安

冷風閣

在洪中

飛閣干雲映碧松月明檻外水溶溶空中何處鳴仙
珮如在蓮花第一峰

望雲門

千嶂蓮開映碧空兩峰壁立斷長虹
峽容白鶴雙飛入直指星河一道通

雲門

遙遙望雲門雲生在山下
仙珮響空中出入青鸞駕

鱗石

靈湫深百尺飛瀑石粼粼
何年鞭海上化作白龍鱗

信宿黃山軒轅宮

黃帝悟道真鍊石飛九天
赤城標特室峩峩山鬱盤
上池燠如春下瀨流且温
嶒岷何崑崙松檜紛葱萃
玉女凝青霞白龍潛碧淵
躡屨從諸子翩翩學游仙

攬衣躡雲門冷風挾翩躚
泛觴漱醉石長嘯揮鳴弦
陰谷拾瓊蕊仙白軟飛泉
天都不可陟一望飛紫煙
奄忽日云暮風雨來層顛
睠焉憇琳宮極夜不成眠
倏忽寤寐間迢遞陵三山
解后雙玉童授我陵陽丹
雲裝恣容與永享龜雀年
感茲遺物慮豈爲浮名牽

白龍潭

六龍僊馭飛天都潭底龍
潛信有無天遣神龍護丹
鼎潭流靈液藏玄珠千年
漭沆煙霞合萬谷氤氳風
雨驅我欲結驂朝玉帝待
看蜿蟺紫雲衢

汪道貫

字仲淹司馬公公介弟

潛口遲龍使君遊黃山

西望衆山明黃梅雨乍晴使君留日馭只尺隔霞城
郊野棠陰滿園亭暑氣清兒童愛山簡竹馬路傍迎
陪龍司理及白榆社諸子宿竹魚庄

軒車暇日此徘徊賓主欣逢鄴下才網集澄潭初饌
入坐依脩竹一尊開莫愁檻外長天暮招得池頭好
月來丙夜狂呼猶命酒不知東閣曙光催

行次硤中

延暑投何處寒帷指薜蘿山疑別天地路欲近星河
谷鳥驚飛蓋居民問玉珂冷風清枕簟虛閣夜涼多

賦得石磴嶺

面山一徑出烟蘿剡剡行人木末多日暮牛羊紛欲
下羣峰倒影牧兒歌

望岳呈諸同游

二十六峰初日升絳節翩翩走萬靈峰頭覓得金光
草同飲華池玉井冰

白龍潭

清潭深復深流水石齒齒仙翁莫浩歌恐驚白龍起
潭上聽琴

高山發孤調流水和鳴琴度曲清潭上青天龍一吟

浴溫泉

幽壑温湯水溶溶玉液香丹砂通地肺碧澗接天潢
晞髮容成侍霞衣素女將葛巾還復着吾欲觀軒皇
望天都
天都直上三千仞俯瞰群峯竦處尊絕壁層雲迴氣
色盤空片石柱乾坤側身河漢疑相逼揮手星辰似
可捫聞說山頭瑶草長休餐吾欲躡雲根

宿軒轅宮

黃山表南服川路何眇默薄言駕巾車從公事行役
首招涼颺整駕載朝日車徒何駢駢曜靈忽西匿

稅駕軒轅宮偃仰長松側山氣日龍從雲光媚將夕
天籟廣樂鳴仙厨衆香食中夜素月流鮫珠泣深澤
志士隘八埏達人晤一室遠近寧足經玄覽各有適

醉石流觴歌

永和蘭亭久已荒上池神瀆誠渺茫何如此水出丹
井澄泓碧澗流湯湯噴岼恠石蹲虎豹啁晰幽壑鳴
笙簧使君尋源事遐討隨處班荆藉芳艸浮雲淨盡
山日明紫氣丹霞滿晴昊涓涓流水送深杯况復隨
風任去來奚奴赤脚持玉笋得之不啻麻姑醅玉琴
奏出流水調惠風泠然聲窸窣當杯入手且盡驩曲

罷尊空一長嘯古人何人為此遊白日西逝無停留
今茲轉眄已陳迹來者誰復凌丹丘使君使君將進
酒容成拍肩浮丘走仙經最說陵陽山朶朶青蓮落
君手與昔尋仙事幾信靈氣此陳蘇芒神對雲車
杖履尋源遠壺觴引興長不知山日隔稍覺午風涼
長揖浮丘伯還依孔雀王彌天風雨至幸不灑衣裳
汪道會 字仲嘉司馬公從弟
天籟賈陪龍使君集洪中 中
洪中草玄處岑寂少經過此日驅車馬相隨到薜蘿

邀懽留地主問俗混漁蓑恠底銷煩暑因捐禮法苛
賦得桂竹灣 括豪韻
桂竹灣前饒桂竹森森秀色拂林臯他時倘憶淮南
隱便逐瀟湘賦反騷

望雲門 天籟具刺何心
雲門遙在望百里表巖從排闥雙峰立當關一栝通
金莖明城外絳節有無中清夜聞仙珮珊珊度碧空
望天都峰 黃山
天都萬丈擁青蓮矯手嶙峋霄漢邊勢壓雲亭虛帝
禪根蟠松檜閱堯季懸厓未許猿相挂晏徑惟看鳥

一穿借問浮丘珠樹雀可能相送到層巔

天階萬宿軒轅宮

黃山秘神秀緬懷晤道真肅駕從君侯百里披荆榛

日晏憇幽谷澹與泉石親言尋軒轅宮飛構接嶙峋

睠焉息玄關恬曠怡心神中夜激清響宵窅入青旻

恍若之帝所鈞天為具陳何必遇松喬勝游良足珍

先民有遺言奄忽如飈塵遙夕誦斯章中情庶已伸

山頭一片石流水鳴濺濺薰風忽相激吹入伯牙絃

丹井隔前谿谿深不可汲時有轆轤聲天女將鉞入

鱗石

六飛初駕鼎湖濱千古遺弓扈小臣群峭摩天雲不

度天風吹下白龍鱗

醉石汎觴放歌

天都之峰何巖崿下有清谿水澄澈千巖飛瀑似鳴

雷百尺迴瀾如噴雪使君携我遠來游翩翩飛蓋臨

滄洲坐弄流泉意未足却掃醉石招浮丘此石向聞

軒帝集手援北斗瓊漿挹碧梧上有威鳳棲清泠下

瞰神龍蟄解衣盤礴坐莓苔撲面青天空翠來臯盧

黃海第

紀游卷十

十三

不用呼五白行杯但遡波沿洞座中賓客時絕倒狂
 歌盡作風格老得酒便醉那復言緩觴更覺憂心擣
 伊誰拂拭鼓鳴琴使君山水自知音須臾慘淡忽風
 雨空潭疑有水龍吟水龍吟聲咫尺回首雲烟迷醉
 石吁嗟樂事已陳迹

返祥符寺遇雨

尋源猶未已促步返招提霧失山頭樹霜盤谷口谿
 千章鳴急雨百尺倒垂霓宛在襄城路寧容七聖迷

潘之恒 字景升

汪氏園同社中諸公遲龍使君不至

仙路迎關尹真源問具茨褰帷寧後發促駕有前期
 河朔邀權近雲門入望遲頻催山簡馬蚤向習家池

陪司理公宿竹魚庄

清夏名園事事幽喜開三徑待鳴騶竹林把臂從茲
 入水族烹鮮不外求坐久天河低照席夜分山月迥
 當樓荷衣已着烟霞色遮莫華胥到夢游

行次硤中

雲門期促駕谷口更邀賓水木自相暎禽魚如可親
 藏書探二酉下榻判經旬好待飛涼雨前驅清路塵

賦得樛木亭 在硤中

黃海
二仲詩
萬曆癸未
虛亭暑氣欲全收坐對青山萬木稠扣戶幾年頻問
字嚶嚶谷鳥故相求

流觴遇雨

千章夏木野雲涼選石清流泛羽觴上客漫歌將進
酒雨師妬殺少年場

發硤中

白榆歷歷近仙家立馬千山擁赤霞去去漫愁緣鳥
道百靈爭逐五雲車

望雲門

馬首看蓮嶽雙峰迥出群倚空時夾日列岫欲裁雲

鸞雀中天度烟霞劃地分晚來窺斗下直透七星文

望天都峰

絕壁嶙峋散紫烟晴峰高插蔚藍天穿雲瀑布河流
瀉迎日扶桑海色連縹緲丹梯懸萬丈微茫玉笈秘
千年何當駕雀凌空上倚杖青冥數嶽蓮

湯池

溫泉初地得一水卽蓬壺濯髮來群帝持巾侍小姑
滄溟疑浴日赤水憶探珠更攬浮丘袖靈源問有無
宿軒轅宮

幽期懷夙昔局促媿轅駒從公尋舊游逸足凌天衢

蓐食登容臺夕憇望玄都豐隆開列嶂屏翳躬前驅
 豈不瞠絕塵終焉追步趨忽忽群動息沈寥山谷虛
 舉手招浮丘導我游帝居鸞雀不為駕驪龍闕夜珠
 我姑酌金壘劇飲多歡娛今夕難再得不樂將何如
 使君山水自知音白雪曾調綠綺琴漫作當年梁父
 曲深潭疑是卧龍吟

白龍潭聽琴

龍潭篇

黃帝真源尚可尋千秋龍卧碧潭深風波瞥見鮫人
 出窟宅寧容河伯侵石迸雲霞變晴雨浪吹冰雪生

寒陰何年會向天門去試聽靈湫時一吟

醉石汎觴放歌

靈谿百道瀉清流上有丹井下龍湫蓮峰歷歷排雲
 出玉乳青芝尚可求半嶺忽飛孤白雀高天倒挂雙
 蒼蚪纍纍澗石供趺坐瑟瑟澄潭任拍浮澗石澄潭
 何錯落烟嵐掩靄開丘壑釣磯竒絕勝蘭亭幽洞寒
 深過艸閣浮白曾偷王母漿呼盧共對仙人博南箕
 哆口具盤飧北斗迴杓細斟酌尋源咫尺近仙家嶰
 谷谿訝曲徑斜青鳥啣來青玉案赤松栽傍赤城霞
 此時更憶汾陽駕此際翻疑博望槎好拾黃姑一片

石還吹天女四時花使君樂極頻回首紛紛世態無
不有即看龍卧起隆中昨夜虎號驚谷口丈夫變化
會有神驂騶豈在駑駘後山阿魑魅巧窺人莫使抑
揄齊拍手荏苒紅顏歲若馳人間何物稱不朽用等
區區世上名不如坐進一杯酒君不見習家池山公
倒着白接離又不見羊叔子千秋淚落峴山碑美人
異代同一時到日絃歌去後思白雪由來幾人和如
淮之酒安足辭

返祥符寺遇雨

縱步探幽壑摳衣歷翠微浮雲千嶂合驟雨百泉飛

路失仙源近游從帝所歸葛巾正欹側還扣遠公扉

別司理公途中有懷

特室竟攀躋襄城路不迷客歸豐水上君度九華西
游夢驚龍窟羈心逐馬蹄嚴程衝雨急莫遣錦鞵泥

郭弟 字次甫吳人隱焦山

賦得飯牛溪 在猗中

山人飯牛罷驅以飲潺湲不必上流去高風遙可攀
壺天接雲冷樓臺倒影閒那知有城市樵採留仙關
浴湯泉贈龍司理

同沾丹洞水却羨宰官身浴罷向何處陽和大地春

萬曆癸未
郭示詩
峰頭仙馭遠澗底白龍鄰去去那堪別應憐出世人

余翔

字宗漢莆田人宦全椒令

宿竹魚庄

共看紫氣駐青蘿車騎翩翩向晚過樹杪晴光邀夜
月竹間流水瀉天河一時詞賦西園集四座賓朋北
海多却笑風塵迷路客狂來欲和郢人歌

游黃山

群峰縹緲削青蓮杖履逍遙破紫烟緱嶺雀來還此
地鼎湖龍去不知年綵霞晴映金光草白石寒分玉
乳泉一嘯天風生萬壑飄然直欲挾飛仙

莊明鎮

字靜甫閩人

行次洪中

雲壑仙源宵天門落月織驚猿時抱樹馴雀日窺簷
一水全縈帶千峰半捲簾自吟梁父後舊識老龍潛

宿軒轅宮

軒皇契至道鼎湖晝乘龍千載渺難追俄此訪遺蹤
巖壑倏已暝白日翳蒼松浴罷丹砂泉過宿金銀宮
拂枕臥烟霞摠衣問鴻濛人生匪金石西日不復東
藉登黃髮期百歲有終窮黃鵠凌紫氣威鳳游蒼穹
託迹既以邁矰繳安所從所以青雲士長嘯出樊籠



原件短缺

卷11

黃海

卷第

紀游四之十二

游黃山記

天都逸史潘之恒景升輯
密嚴居士丁惟曜貞白校

謝肇淛曰黃山高四千仞逶迤數百里以不郊於通
都故游履罕至卽至而游於險罕有窮其觀者戊戌
九月余自鑾江挾于楚而南蓋將問鼎於軒轅氏廼
邑大夫雅與余善宿戒輿馬共命而主潘君景升所
適吳山人元翰自錢塘至四人相視莫逆也遂以孟

冬之十日行矣一發而抵楊干寺寺負嶺而面溪溪流瑟瑟作笙篴聲余要元翰窮其源里許得石憇之景升課詩如功令于楚懼逋甚挾一卷從且讀且哦意殊困旣暝入寺坐松間新月婁朗寒色襲人于楚亟索酒至輒酌無遺瀝有間鴟夷枵矣各就寢詰朝過容成臺迷失道田夫指而右乃得徑衆纍纍然度嶺天霜以風景升謂此往年余宗漢醉跣所也今安所得酒乎度嶺復下者三乃抵山口望雲門諸峯森若列戟又五里許折而右爲嶺中是爲汪伯玉先生所營菟裘長堤清湍白石翠壁相向依然然而事去人

亡不可問矣已復緣石度溪觀漏池及架壑舟于楚憚弗往余旣往比返則失足水中濡履及鞵從元翰丐鞵而去暮抵芳村宿謝伯貞齋中主人網池中巨鱗佐酒且戒客扃扉無夜出是地多虎問黃山程曰可二十里而近衆踴躍不能寐以主人言強須質明則皆步以往十里爲湯口二三叟程姓者指點天都示客秀色閃爍不可正視又十里則軒轅宮矣僧竺出肅客薦茗問溫泉曰是不盈咫尺第須飽食往不者水氣蒸人余笑謂吾戰勝者固無苦且若山澤之癯何要于楚往觀溫泉吾郡最多然氣味若硫黃卽

驪山沂水皆然獨是泉泓冽甘香蓋硃砂穴也比者八月間砂溢水沸赤者三日觀頃之元翰至又食頃景升至以次浴浴已問僧所之僧對若朱砂菴近而峻醉石坦而遙白龍潭丹井伏亂石間恐不可以趾命沙彌以邛杖進度嶺百折而至菴群峯拱立如翠屏霞光雲氣繚繞人裾而天都最爲孤起非羽翼不可登鉢于盂峯翼其肩則景升少年時嘗一至焉僧爲余言比歲有徐氏子以家難捨身直至絕頂三晝夜遇神詬之欲擊以雷乃返頓躓幾死于楚謂夫夫也何歸爲卽震死胡害元翰曰吾不能抵絕頂而歸無

寧老是菴矣刺刺與道人語不置道人累稱而窮余目攝之乃去僧要從他道下踉蹌竹木間五步一失賴落葉厚得無損復折而右二里許爲白龍潭潭且洹凝綠如油醕而甘之一洞穿石底旁出余縋而下踞盤石上濯足而三人者且之丹井余袒跣追及之井小如蹄泔殆非其質已而僧覓醉石者徧索不可得衆擲揄之僧詢土人曰師誤矣從此西且數里於是衆謹然復上里許至山君巖元翰憊臥留一奴守之又前可二里道周一石欹弁若醉人狀僧曰是也是不勝栝杓幾一逃而不獲他石疊如累卵水淙淙

瀉其間曰鳴絃泉踞而樂之暝矣乘月而歸回望天都一峯則殘日照耀如初旦時也衆共駭異久之至寺程叟以壺漿至坐中談黃山者不一口景升主丞相原甚力且曰使君從丞相原至海子則觀殫矣余謂諸君無譁旦日能以雙不借從我乎衆唯唯歎元翰有難色曰不佞病矣請作少文臥游以須使君不者以七尺軀殉山靈無謂也寢興輿十里至湯口踰山背而登七里至苦竹溪主章姓者謀所適章難之曰山紆削而蕪僅有樵徑耳其若使君何景升曰使君不馱至丞相原也且之海子衆縮頸搖手曰原以

往皆叢棘矣且安所止宿余不聽募開道者得二樵夫與之斧斤命與人持襍被或負鐮及糗脯且行且息至所謂十三灣者足力盡矣命奴前後挽且推之十里爲九龍潭篁簪交塞衆欲舍之而過余不可目執斤者先行斬枝芟刺而下至潭潭水亦涸流潺潺不能作瀑布飛時行旅渴甚吸無筭余恐驚龍眠也止之循故道上道益險絕或履樹根或緣石壁或接以容足之木下臨無際于楚體脂而興勃勃輒先數十步遇竒絕輒大呼諸谷響應景升謂余使君那得十部鼓吹乃爾無何殘日隱峯明月動野山中白花

如蘆茫茫萬頃如行波濤中迨原而夜矣從原上望
天都峯較近而差偏故不及朱砂菴竹房二所相距
百武一爲爨下諸從人闐咽一爲老僧住室湫窳欲
崩于楚危之携衾他往余與景升共榻宿詰旦易
履而上山路始窮樵夫前導常聞丁丁聲行者越危
石攀低枝手挽足移目眩心悸旣至石樓衆喘如吳
牛矣景升賈餘勇前進于楚謝不能往余亦難之二
人偶坐以待良久不至始歸原上飡飧已景升始至
云將達海子度沙嶺幾失足乃還衆相視而嘻於是
爲歸計別僧下山至湯口宿馬二人各舉奇險以詫
元翰元翰以未爲所懼亦津津自喜也翼日宿山口
又翼日宿景升有芑堂余酒中語三君山川顯晦固
自有時吾嘗導天目沿霧巖歷三天子都及其它表
表在人耳目者要皆地中培塿耳以黃山之神秀盤
鬱宏暢幽竒江南諸峯伏而不敢賓乃秩宗弗及禋
祀靡加卽今昔詞人諷詠亦何寥寥也若非軒轅氏
者幾湮沒而不稱矣夫士瑰意琦行而負遺俗之累
者不亦黃山也耶三君憮然不能對余因次其游之
崖畧而併及之游七晝夜有竒得詩如干首

游黃山詩

謝肇淛

字在杭福建候官人壬辰進士以罷湖州府司理來游後陞南職方郎

雨中訪潘景升有芭堂賦贈

兩過空齋剥琢聞客來知是武夷君劍從豐水橋邊
合袖自寒山寺裏分詩篋盡裝三竺月荷衣猶挂九
華雲相期明日黃山道踏破蓮花看鶴羣

同吳元翰謝于楚潘景升步楊干寺外

半林返照暮煙平坐聽寒泉百道鳴古寺僧同黃葉
臥隔溪人在翠微行馬衝遠浦孤雲影犬吠空村落
木聲樵唱漸歸山徑晚天都峯頂月初生

宿楊干寺

午發豐水溪暮投楊干寺二十五里中秋衣濕幽翠
滿目楓林丹始知嚴霜至流水赴空潭泠泠如有意
孤山無四鄰殘僧擁衲寐碑古蒼苔深稍辯咸通字
夜色似太古溟濛但一氣半月骨高松鬼火出深荔
中宵零露寒斗酒未成醉明發復行役風塵多憔悴

容成臺

神仙不可見高臺空陳跡落葉無人行悲風動松栢
霜橋度馬危煙樹啼禽適具茨路欲迷徘徊日將多

出楊干早行

曙色正蒼茫清溪抱岸長酒醒人怯霧木落鳥啼霜

水浸寒苔綠山凝宿草黃牧童不識客短笛度橫塘
山口旅次

霜摧宿莽滿郊原紅葉千林嘯斷猿溪路窮時通竹
徑亂山盡處見雲門寒流馬怯飛湍急午食人爭野
店喧自笑勞生塵土裏浮丘何日接軒轅

礪中懷汪伯玉司馬

空山鑿破水他流半壁猶存架壑舟昔日精靈成異
代隔溪亭榭亂雲秋

黃山主人歌贈謝惟弘伯貞

主人家在黃山趾采藥山中汲溪水生平愛客老不

衰車馬及門驚倒屣蒼頭掃榻開中堂兒女羅列遞
行觴池網金鱗作羹美田收玉粒新炊香從奴有酒
馬有芻回身問客更何須土屋竹牀差可睡夜中勿
起防於菟老人慣識天都路明日扶藜伴君去

雜詩

寒流决决草蒙茸翠壁丹梯千萬重天外雲門相對
出居人指是剪刀峯

古寺空山鳥道邊板橋流水寺門前老僧鎖却竹房
去浴罷溫泉石上眠

朱砂菴

黃海
謝詩
萬曆戊戌
天開三十六芙蓉萬壑千崖紫霧重野客攀藤探古
洞道人憑几看秋峯藥苗采去常分鶴竹杖携來欲
化龍爲問丹丘今在否可容雙屐一相從

望天都峯

天高不可極地軸東南傾黃山抗神秀勢若相搪撐
憑空肆遙矚八極何冥冥浮雲遙變態孤峯長自青
礪淙曼寒玉石髓飛紫英幽色契妙賞超忽棄太清
緬懷軒轅氏委蛻遺世榮盈盈天漢末靡靡雲霓旌
丹鼎不可見金簡詎能名悵然遺物慮側身中屏營

白龍潭

礪道層層濕翠微綠苔紅葉滿秋衣雲封古井丹何
在月照寒潭龍未歸巖半水簾如雪落風中石乳作
花飛我來拾得金光草欲向山靈買釣磯

醉石

危石拱天都臨溪臥綠蕪醒湏微雨解欹藉古藤扶
苔壅時深淺雲生乍有無夜來人散盡蘿月一峯孤

宿軒轅宮

甍借雲房宿仙蹤迹已陳溪聲寒到寺峯影近窺人
竈冷丹砂火苔封玉檢塵鼎湖龍去後何地可尋真
九龍潭呈于楚景升

九道寒冰瀉遙嶺蒼苔疑翠芙蓉冷白日時聽雷雨
聲丹崖倒挂蛟龍影帝子乘龍去不歸空餘紫氣暮
朝飛與君一軟塵心盡醉枕寒流看翠微

登丞相原

芒鞋竹杖薜蘿衣叢棘初開一徑微十里荒山僧窟
盡千盤棧道客來稀風腥龍向蒼潭起雲暝仙從紫
府歸看遍蓮花三十六玉笙吹徹晚霞飛

丞相原寄元翰

平生多勝具何事復淹留萬壑啼猿夜知君正臥遊
藥從山客買糧學病僧休待我丹成日相邀坐十洲

宿丞相原

鳥道石峻嶒孤峯一老僧竹樓千嶂月松榻半龕燈
山鬼寒依草溪猿晚附藤霜風眠不穩只恐夜雲崩
由丞相原至石樓二首

曲磴雲端出晴嵐樹杪來蓮峯看漸近蘿徑剪初開
崖斷牽藤度沙崩抱石迴頽然發長嘯萬壑暮

生哀

看山不覺險已出白雲層猿踞松門臥人緣石屋登
半空無度鳥太古有埋冰翹首天閣近何時拔宅昇

原上答景升

丘壑空憐我煙霞喜得君石樓曾望海竹榻共眠雲

度嶺窮幽徑摩崖識古文新詩與靈藥滿袖碧氤氳

黃山歸宿湯口程主人家

知君喜客至值我看山歸衣上留書青靄燈前話翠微
水聲排戶入霜氣近牀飛相戀仍愁別風塵此會稀

歸宿景升有芑堂二首

十日看山一日歸輕塵落葉擁柴扉布袍脫向堦前
樹猶有蓮花片片飛

豐水溪邊對晚嵐却疑身在白龍潭開門童子向人
笑拜乞丹砂共藥藍

吳潛

字元翰莆田人嘗游方外居武夷山最久

過潘景升有芑堂與謝在杭謝于楚訂游黃

山約

靈山空翠裏何日定攀躋晚歲思丹壑秋風吹杖藜
青溪千道折紅樹數峯迷已自成衰髻丘樊未穩棲

宿楊干寺

千峰寂歷散秋輝孤磬寒燈坐翠微落葉聲中村犬
吠清溪影裏水禽飛月隨山客開蘿幌松借鄰僧挂
薜衣早已無家成獨往如何鄉夢尚南歸

楊干寺溪上卽景

疲鞍投古寺落日滿漁梁紅葉半溪水青松幾樹霜

歸人喧野渡行客漱秋芳蕭颯涼風起褰衣還竹房

宿謝氏村居

數峯迴合處別墅謝公墩白髮餘閒事清川常在門
鳥巢危落葉魚網挂黃昏眷此棲真地因之念故園

千鍾守 硯中懷汪司馬 寒窗坐翠軒 茗葉香中鉢

磻戶深深鑿翠開青溪繚繞誦經臺看碑不見羊開

府蘿月松風山鬼哀

靈山 宿祥符寺

行宮四壁削峻嶒縹緲天都不可登雲氣寒侵多病

客溪花瘦到絕糧僧孤峯晚照銜清淺古殿秋風見

廢興去日丹砂今寂寞白頭愁坐石幢燈

湯泉

溪壑層冰凍不堪溫泉一道出山南桃花萬點丹砂

色雪夜行僧醉石潭

望天都

石削孤峯入杳冥洞中無復見丹經半空龍虎埋雲

黑太古藤蘿宿雨青瀑布迢迢吹帶影芙蓉點點散

榆星秋風夢裏朝元去咫尺天門夜不扃

朱砂菴道人

有叟竄黃嶽不知何代人衣食依草木坐臥無冬春

疑是廣成子煉藥以還真中峯亂石矗十步九迴曲
朝采松上花夕挂崖間宿露肘雲滿身脩眉雙眼綠
千拜若微醒始授我金精冥冥自久視不死亦不生
語罷復長睡何能知姓名

白龍潭

黃帝乘龍歸紫氛寒潭龍氣故氤氳丹砂古井人空
到蘿薜行宮路不分絕壁埋深三峽雪飛泉流斷一
溪雲我來拾得驪珠在照見蒼蒼玉簡文

在杭于楚景升登丞相原余臥病軒轅宮有

懷邵寄

溪上軒轅館峯前弘景原我留燒藥鼎君去覓花源
架壑橋誰度棲鸞樹幾存群仙今夜宴不得薦蘭蓀

別黃山

萬壑千崖杳靄間尋僧一日又空還青溪白髮茫茫
去迴首寒雲似故山

宿湯口程氏村居

老人家住桃花水短衣過膝髮掩耳向夕携尊丹館
旁今宵留宿山窻裏山窻片片綠芙蓉風落天都古
寺鐘飯罷晨炊客上馬月光斜挂石橋松

歸宿有芭堂

只爲尋仙去拂衣便不還誰知塵夢裏依舊是人間

謝室

字于楚歙山人

陪謝在杭使君游黃山尋楊干寺

日落遠山暮林深啼鳥稀度橋清客影下馬揖僧衣
竹院亂紅葉茅茨在翠微近家無十里何事不言歸
楊干寺溪行
林煙村靄望中分短褐從游陋少文愛坐小溪聽激
溜獨臨危石看斜暝高原處處多紅樹空谷時時有
白雲更欲攀躋疲力盡上方鐘磬隔林聞

楊干寺月夜

明月珠庭滿幽期愜賞心逢僧疑世遠引勝入谿深
嘯咏從旁詫壺觴每獨斟風寒霜欲下烏鵲噪前林

過硤中

蒼苔紫蘚石梁橫翠竹丹楓萬壑清磴道久無行履
跡草堂疑有讀書聲

飲族姪伯貞宅

宅傍碧溪潄溪聲滿竹林藍輿來谷口礪道卽山陰
投轄傾家釀忘機狎野禽山居朝日晏隱處暮雲深
逸興每高詠無營自息心溫泉時可浴策杖入遙岑

雜詩

入山千萬曲曲曲皆清溪絕溜挂青壁澄潭涵翠微
 賞心心逾惑寓目目多奇前蘿既攀牽後磴復升躋
 谷午山雞鳴嶺寒猿狖啼鑿空有新術滅跡忘故蹊
 道險崩查接沙傾時復危不見廣成子空懷軒轅師
 暮色紛紛來林昏煙火熹仰視最高峯靄靄尚餘暉
 始知日月光東西相蔽虧怳怳思馳越超超神獨怡
 昨來塵市心已失入山時寄言嘉遯客無悶欣在茲

浴溫泉

軒轅丹未就丹藥發靈芽餘火熾泉脉百沸湧金沙
 浴罷振衣起氤氳散作霞

游丹砂崖

霞梯丹壁一重重四望天都面面峯寂歷幽谿下寒
 葉迴環深谷護霜鍾尋仙有客閒題石採藥何人
 倚松興發會須長獨往還來時恐白雲封

醉石歌

我聞崑崙墟生草玉紅色有實甘若飴一飲能醉十
 萬日爾時想君飲過差醉中化為空山石為石空山
 幾萬春傾頽局縮如人蹲髮成薜荔猶蒙首衣化莓
 苔尚覆身我來拜之復長喟眾人皆醒爾何醉知君
 埋照不肯言余痴解爾醉中意醒者心闔不得聞何

如長醉臥山間雲霞變幻自明滅車馬驅馳任往還
吁嗟世事役役寧若此削除煩惱無生死但令有情
之無情貴賤彭殤俱妄耳

宿丞相原

自是無塵處何煩問世喧長林眠草鹿絕壁挂藤猿
僧認人游路雲封仙到源愛竒探險盡幽夢亦飛騫

九龍潭呈在杭景升

澗石磊磊澗水流蜿蜒垂作九龍湫鏡開百尺清無
底鐵立四壁深且幽有客芒鞋歷丹嶺俯見此中明
月影迴身直上萬仞山莫貪明月遭龍醒

丞相原寄吳元翰

時元翰病留祥符寺不至

石牀苔蘚厚如茵石戶藤蘿絕世塵採得紫芝堪茹
客留將紅樹表迷津寒霜游子多鄉夢明月空山想
故人莫是道心應屬懶只憐孤寂倍傷神

山行雜興二首

石面莓苔繡古痕蕭騷紅樹似桃源山窮鳥道疑無
逕水逝魚梁別有村

鳥啼杉栝晝陰清丹澗流泉泱泱鳴峭壁迴巒千萬
壑拾來瑤草不知名

贈黃山程汝毅汝脩明夫三老

巢由抗高志棲身箕穎間余性頗微尚欣躡黃山顛
昔聞容成公煉鼎邀軒轅偶杖入幽谷探竒窮深源
儻逢洪厓生乞我藥一丸不渴復不飢乃得乘紫煙
空往既空返明月笑人還嗟余凡俗士何能生羽翰
道逢三老公長揖向余言家住黃山下躬耕黃山田
古貌復古心混俗德乃全飭我白石髓飲我丹砂泉
生子既有孫奚必求上仙聞之發長嘯再拜授所餐
願言接高鄰同爾聽潺湲

倦憇石樓望景升登絕頂尋海子

倦憇石樓下看君興轉生危沙捫葛上棧道接人行

半嶺時聞嘯孤峯更勒名無能生羽翼乘爾腋風輕

山夜謠

日既沒兮月既升谷逶迤兮洞壑杳冥林木軼轆兮
風琴琴礪石磊砢兮泉水泠泠虎豹守關兮上多猿
狄悲嘯慕類兮以嘯以騰懷遙夜而申旦兮羗遐思
而寢興星爛爛兮山欲曙雲容容兮擁堦庭起披衣
兮須我友撰余策兮以晨征

還豐溪卻望黃山作

網緼望不極紫翠鬱重重雲門千嶺外忽覩蓮花峯
一望一惆悵茲游興頗濃歸來懷逸想那復繼高踪

潘之恒

謝詩

萬曆戊戌

游黃山記

凌登名曰辛丑冬十月走池陽謁觀察柳公取道宣
州之太平縣縣西二十餘里實爲黃山門戶云先是
李睥如使君行部太平事且竣擬入山問軒黃上昇
事與其同年友崔司徒訂約矣聞予至撫掌大噱聯
轡而西暮宿李氏山居旦日以籃輿躡磴行前望一
山龍嵒峭拔怪石巒岈其上訊之士人知爲芙蓉峰
也由峰而南一峽孔道亭其上亦曰芙蓉駐車一望
天都而下諸峰盡在襟帶間其最近者五六峰所謂
獅子石牀松林雲外丹霞紫雲之屬如玉筍如蓮華

如仙人掌如毘耶青螺髻玲瓏斲削緣障數里翩翩
躑躑若雁序然蓋五丁所不能排般倕所不能造見
之大呼欲狂真耶幻耶天生神物宗祖山川數千里
大江之南含澤布氣毓秀鍾靈信非偶然者徘徊戀
戀不能去稍折而東下緣崖仄徑轉入深谷中頰澗
觀泉一泓中匯漱爲寒瀑卽白龍潭也其名不雅馴
皦如因易之曰流翠又上二里許至青龍潭巨石橫
亘其後水潺潺出石罅中下注潭底其中積翠可摘
璀璨奪目欲染人衣視之一蹄泠耳以綆約之深且
倍尋予乃新其名曰澄碧水際盤石延袤數丈許平

衍如席依然跏趺坐亟取囊中松蘿茶烹潭水共啜
味冲甘酷似揚子中泠或謂過之居有頃彭明府以
樽罍至觴數行復輿而上皦如謂此行不攜琴來大
是欠事蓋一時松濤礮瀑谷籟禽言信非焦相聲不
能和荅李君之言有味哉又里許爲松谷菴飯於僧
寮旣罷繇菴後過黑龍潭觀水水流澗中鏗然成韻
澗旁亦有巨石相與攝衣而登箕踞其上絲簧雜作
與溪響和鳴不減張樂洞庭共浮一太白以樂之第
潭之名無所取義余復更之曰漱玉是時疊障九龍
軒轅望仙諸峰咸在指顧間影落杯底與諸君謀登

天都絕頂則計程尚有一舍而日且迫下春矣即近者如翠微寺亦阻躋攀返而止譚氏之廬焉職方家言黃帝遇浮丘公容成子於此山遂以得道神仙之事理應不舛然則湖上飛龍峰頭跨鶴即其地歟顧靈區奧壤大半麗新安部中是予籬壁間物也奈何去郡百里而遙卒不可得至客秋奉檄循行地脉有事茲山遙望成四詩而中道忽有別召遂不果登自崖而返深以為恨不自意池陽之役方跋跋牛馬走中無心攬勝探奇乃得從皞如了此夙願豈山靈必假重名流始開其秘耶不然何事之有待若斯也

詩附錄

凌登名

字元孚武林人任新安郡丞

秋入黃山

有序

具茨之山以黃帝問道廣成子得名金陵王氣寔鍾於此開採之役幾於不免賴 皇上神聖孝思可憲臺之請惓惓致戒以毋傷龍脉屬小臣會勘得探其勝云

迢遞黃山路緣溪一徑通不因尋地脉那得御天風
鐘梵翠微上樵歌青靄中浮丘儻相遇長揖問
為訪鍾山脉乘秋特地來名都號天子王氣接中台

豈有金銀色翻令草木哀高峰三十六爲我刻

蒿萊

懸厓千萬仞六六翠芙蓉黃帝經行處白雲常自封
西來奔萬馬東去走羣龍彷彿聞三祝還應達九重

石壁道中放歌

石壁千尺翠欲滴下有溪流湛寒碧紫芝瑤草亂紛
披花落花開人不識隔溪一帶深樹林其中窅窅藏
幽禽相呼相喚如有情悠然琴瑟諧好音纖纖游鱗
戲蘋藻兩兩浮鷗卧莎草一望平疇灌溉多滿眼灑
灑足秔稻溪山花竹相掩映歌詠無能盡形勝武陵
往事豈偶然繁花曲水如仙境使君策馬青山來丹
厓繡障相望開恍疑屏風疊翡翠一一倒挂長空廻
昔年曾涉武夷水九曲靈區謂無比請看黃山石壁
奇山川之美無逾此溪流忽作金石聲簫鼓雜奏相
鏗錙高山流水萬古情興酣落筆秋霞橫

冬日過太平彭明府招同李皞如崔計部讌

集黃山松谷菴與皞如限賦四韻得仙清
丹霞四字

軒皇問道此飛仙遂有奇蹤海內傳往事尚聞丹鼎
在孤峰自與白雲連朝元路豈尋常遇兜率天疑尺
五懸乘輿偶來同騁望遙看鸞鶴舞翩躚

片片峰頭指點清分明怪石似青城欲加題品難為
調縱有神工削不成古寺蒼松常覆谷洞門白石舊
留名天風萬里堪長嘯兩腋飄飄羽翰生

三潭次第列雲端遙印霜林楓樹丹常日為霖滋大
地有時歸海作驚湍清分一酌詩脾潤靜息諸緣瘦
骨寒未必神仙不可接且於石上共盤桓

聞說天台路不賒浮來杯上見胡麻雲中對列三生
石檻外橫流五色霞帝子龍髯攀不及仙人鶴背去
還遮本來骨相原丘壑願乞名山訪鬱華

李春熙

字暉如
官太平司理人

余有事天都之下喜凌元孚偶至遂為黃山

游日莫宿望仙鄉賦此

白岳情猶繫黃山遇更奇關門一以望轍跡欲何之
為闢雲霄路欣乘開霽時但償山水債寧顧尚書期

心遠興為饒諸峰插碧霄斜暉村欲落半道主相邀
谷口拚先醉仙人望不遙更闌松月上聽籟若聞簫

登黃山同凌元孚崔民部彭太平讌松谷菴

限韻四律

岩堯橫絕白雲顛共說前峰是望仙市子乘龍何處
去小臣攀鼎至今傳餐餘石髓抽為筍藥點山頭半

吐蓮百里烟霞封鎖固不容塵世寄桑田
 青玉芙蓉巧削成洞前流覽更堪評環奇儼若排仙
 仗攬秀真如謁上清問道石門愁欲閉尋真松谷寂
 無聲山僧指點龍湫水一片冰心好結盟
 龍潭洗藥化為丹樂彼洋洋可當餐僧昔持盂分法
 水龍時飛雨作驚湍清涵寒玉深如淺碧瀉晴光散
 復團病渴相如隨意酌金莖不待掌中盤
 徼雲地主訪煙霞六六峰開霧不遮游續雲巖馮杖
 履行依玉樹照蒹葭松間揮塵風如穆石上傳杯興
 更賒長劍倚天狂欲叫仙人歸洞夕陽斜

黃海 卷第

天都逸史潘之恒景升輯

水田居士吳 琨越石校

紀游四之十四

游黃山記

馮夢禎曰余辛巳遊新安以不及到黃山為憾懷之
 廿五年茲當首議以三月十二日自巖鎮如溪南館
 於吳太學用卿之上村草堂而吳中舍百昌兄弟業
 於黃山親黨相次百昌之弟民望余南雍生徒百昌
 推及願為地主給余黃山供連雨未果晴又以事奪

二十一日冒雨西北行進路五里卽入山溪葱菁間
化城足樂而况寶所蓋黃山本稱黟山而附會黃山
仙踪改稱黃山則始李唐名峯三十六谿稱之盤礴
徽寧池三州五百里脉自三天子障或云雲門一峯
爲中榦實留都兩天目之祖或云留都兩天目俱發
三天子障而非黃山事非躬歷聞舛異同不敢臆斷
雲門者兩山如門雲通其中俗名剪刀峯百里外卽
可望間翳於雲氣諸峯惟天都最高潘景升常登鉢
盂峯僅及其麓游客無敢登者次煉丹峯坐湯寺紫
玉軒雙峯如丫卓立雲際者是其峯僻在海子最近

蓮花峯脉所從來前引海門至此則黃山之勝便如
引鏡照面堂奧畢陳余故急海子前此閉塞近有五
六草菴問途東徑通丞相原西徑通湯嶺至白雲菴
而半徑最陡削微級沙石間布鞋竹杖兩壯夫推挽
始克進步余從西徑旣至白雲菴則群峯數十排筍
雲際使人驚心動魄以廿六日宿菴中次日行十餘
里至海子升九降一難於天門九重汪文學潯延入
草菴余名之海潮因書十菴名俱蒙海字以待其足
是日日未晡且晴余以倦卧鵝兒從景升申清虛僧
印我先登歷覽過文臣峯返而誇語竒勝余悔不賈

勇次日雨作日中而開余挈杖先登衆從之遂登煉丹峯初尚霧漸上漸開隨目所及遠近紫翠畢露從登者余兒鶴雛鄭翰卿黃問琴丁南羽謝伯貞也而景升從清虛別詣煉丹臺不至自峯頂視北一峯玲瓏蒼翠類大士所坐海山與南羽鶴兒就之遠勝近劣歸途迷入密箐里許而出既達原路諸君子與景升清虛業分踞海門諸峯問琴招余余三人從之遍歷諸峯其稍南一峯尤竒爲鄭翰卿所踞上有修石卓峯端十丈許而下斷如一線呼之飛來石盤石承之景升清虛先上鶴兒印我繼之餘不能從自飛來

石循徑而北爲石筍岡松谷菴而所登海門凡五六峯離立如巨靈斧擘從斷處下窺不測其外諸峯駭怪逞竒起伏縱橫以千百數而玲瓏如一龍窟在下謝伯貞云先游者二僕夫戲擲大石轟轟而下驚龍致雨雹伏地一時許而免自煉丹峯歷海門直見九華大江四面通望不減千里山產矮松高者不過丈許頂俱如蓋其當煉丹海門間尤多而竒好事者購之以充盆景人百計取市活者頗難托根深山而不免自賊例之直伐甘竭爲咨嗟久之下山霧合如故夜深雷雨大至山谷震動卧處頗漏恐其逐風雨去

豈亦僕夫投石驚龍致然歟次日阻雨諸君子分處
三菴咫尺不能往來下午景升清虛見訪始見其所
注陰符右道左術可稱篤論次日晴從東徑下山始
達嶺西望白雲彌滿山谷一山映朝暎峯端忽變金
色大竒徘徊久之迺下路出谷中級石細步婁頓而
憩已得大石引諸君子坐其上問琴唱曲與縣泉百
丈聲相和行未半前有岐而惑見急足持書至則方
伯文明府牘也賴其指迷以出丞相原然愈下愈艱
矣丞相原不知何以得名兩山豁開中饒林木附近
數里山花紅白如繡相傳爲虎穴景升舊館在焉謝

在杭嘗信宿其處蓋遊人多集湯寺或能至丞相原
非忘形好奇者不能到海子景升云近有九龍潭最
竒上如甕口下深不測龍潛其中凡九九久旱則下鐵
牌兩立應余與鵝兒旣從輿隔山遙觀但如曳匹練
耳謝伯貞別於苦竹溪余父子先至湯寺諸君步行
後之景升最後黃山一丘一壑足奴視白嶽其佳處
不能縷數余戀戀者海子湯泉耳先後凡四宿湯寺
六浴湯泉三宿海子湯泉天下頗多俱以硫黃白礬
爲根惟此源朱砂氣味香美解劬蠲疾是役也凡十
二日往返晴二日半晴二日而遍歷諸勝可謂幸矣

惟斷乃成信然其從游者黃問琴自武林潘景升自
 巖鎮白嶽且多贊游之功鄭翰卿自溪南不期而從
 待於湯寺者丁南羽與其叔貞白景升子弼予期而
 不從者汪仲嘉從自溪南而返於洪中者吳用卿別
 於湯寺者丁貞白潘爾尚從自湯寺者僧本竺來慎
 得並書云乙巳夏四月朔記於湯寺紫玉軒

游黃山詩

馮夢禎

字開之嘉禾人僑居武林官至南京國子監祭酒

冒雨發黃山駕

老去愛探幽千峰雨未休前驅煩地主後乘總名流

啼鳥嬌藏樹垂楊碧掩樓出門隨地好况作黃山遊

到新安之次日方明府招飲溪舟西泝而下

至漁梁改席禹廟汪仲嘉潘景升同賦

昨稅山城駕今汎溪上舟茂宰敦舊契良知陪宴遊

出郭凌漭沆登席狎鷗鰕卉木滋兩岍簫鼓咽中洲

川光乍濃淡巒氣互沉浮水嬉極沿泝山尋畢獻酬

噴雷通積水如箭赴洪流禹功古不刊吏績今見收

入眸但煙靄理策何阻修寵靈乞地主次第諧冥搜

過石壁山五里巖

入路溪山雜尤欣石壁奇草鮮因帶雨樹古不沾泥

迴合曾無徑幽深忽辨岐自憐客遊者何計結茅茨

未至硤中五里憇嶺上小亭望前山雨氣

偶憇山亭下侵尋雨氣浮千峰翠如失幾點白相求
弱態斷還續輕姿淡不收莫貪晴色好即此足欠猶

宿硤中蔣氏園

黃山未可到今夜宿硤中宵雨連朝下輕車歷嶮通
有樓堪坐嘯得主未途窮莫計陰晴事披雲任化工

初到湯院作

清旦發硤中下春到蕭寺仰流籟瀾急穿霄境逾邃
列卉多奇產攢峰半雲翳山僧遠逢迎良朋久延遲

指途澡溫泉觸體却氛膩砂液有時發珠函何代至

緬懷軒皇前欲抽玉書秘未能扳雲峰今夜卧蒼翠

於蓮花庵望天都

山僧新結宇掌可捫天都清旦從之遊蓮華盡開敷

為余搗青精列坐饌伊蒲縣流迸石罅雲氣蕩虛無

天都在天上今與眾峰俱耳目尚變幻丹青詎能圖

從石壁進路過支機橋尋支徑訪硃砂庵址

登憇久之書所歷

禪居興未索覓徑恣幽討沿流戛槩瑟穿雲進窈窕
源深即平曠巘雜入霞表細泉響彌清亂石淨如掃

黃海
馮詩
六
萬曆乙巳
興到足忘疲嶺高溪更遶前瞻峰似削參差巖岫巧
吾雛忽凌虛玩松陟縹緲憇危物如遺宅幽僧古少
吾欲餌靈砂巢居此終老

宿白雲庵

禪扉叩白雲客到未斜曛排筍峰離立如簧瀨互聞
鷗機久以息僧侶乍爲羣到海止十里穿霄夢亦勤

到海子

海子關何年扳躋直到天層層穿峭壁處處響流泉
雨氣晚來淨夕陽西墜妍明朝登海頂咫尺挾飛僊

宿海潮庵阻雨

高興發層霄還愁氣未消霧深開復合伴隔邇咸遙
覲面千峰失娛心一卷饒莫嫌禪室小且喜離塵囂

初霽登煉丹峰

阻雨坐一室政如鳥在籠推窗睹霽色心已馳虛空
衝泥道崇嶺徒侶欣相從雙手扳丹梯兩掖生天風
軒皇煉金液此地留玄蹤聳身到峰頂下界煙濛濛
環坐松石間翠色澄心胸霧消山遞呈青紫禪妍容
安得乘日車踏遍高低峰

登海門瞻眺

登峰尚餘勇回策進海門巨靈奮高掌離立存斧痕

黃海
馮詩
萬曆乙巳
紛披如攢戟縱橫欲飛騫其下潛蛟龍一怒雲崩奔
吾徒悉高興危石爭先捫指點雲外巘一線江光翻
東南信多奇此山宜見尊

三宿海子從東徑下山返湯寺書所歷
三夕宿海子與盡宜還歸及晨扳東嶺下望浮雲彌
層疊露遙巘邇岫隱朝暉金翠乍掩映去住情猶縻
入徑兩山逼衝霧前途疑瞻峰易俯仰涉澗婁昂低
歌聲亂縣泉鳥韻雜花蹊出谷日初午捨車陽已微
急瀑飛九龍匹練明山基觸聞并蘭馥入睇盡靈奇
抵莫休紫玉澡身欣湯池

丁惟曜

字貞白休寧人

同南羽姪潘爾尚祥符寺坐雨遲馮師不至
春山不雨晝常陰况復連朝苦滯淫絕澗鳴泉和梵
響危峰分翠滴空林吟邊忽起千秋色卧處猶懸五
嶽心咫尺故人期尚爾天涯芳草耐招尋

蓮花菴望天都峰呈馮師

雲林深入瓊烟霞翹首天都逼翠華迦葉寸莖成寶
樹毘耶丈室擁蓮花貪分上味頻供筍可解中煩只
喚茶未脫塵緣隨汎海卻從何處問浮槎

丁雲鵬

字南羽休寧人貞白族姪

早發山城從貞白叔入黃山

朝霞媚晴川宿霧霽郊郭攬衣起陵陸濡裳涉巨壑
流浪戲輕鷗攀躋接飛攫行行客子勞快快年華爍
晚節見青蒲新篁解紫籜徑是苦連鑣林深枉廻薄
越俗慰良圖愀衷沃文若暫甞爾絕雞羣昂藏依野窟
宿高橋

草閣倚危岸溪聲滌客心雞栖村樹暝月午嶺猿吟
風剪春燈亂歌殘夜漏沉明朝披宿酒杖策入雲林

朝雨發高橋登雙嶺菴小憩

入谷啟朝昏肩裝冒雨痕坳蘿沿嶺表陰翳障雲門

黃海 卷第

天都逸史潘之恒景升輯

西林居士程明鳳儀甫校

紀游四之十五

游黃山隨札

王之傑曰余嬾拙無異尚獨山水情殷丙午春要鮑
元則躡飛布絕頂北望天都雲霧遙接杖屨游興勃
然遂約偕往開夏四日會僧若水同行過容谿裴圃
谿上訪容成臺宿于洽舍曉發越二嶺爲拱中入芳
村問黟山精舍遂涉浮谿谿出浮丘壇下由湯口抵

祥符寺寺藏綠陰中古木新篁留雲翳日前爲香谿
元鄭師山釣磯在馬谿聲如雷塵障一洗若水從蓮
花菴還海子余同元則過板橋浴於湯池池上刻字
滿壁蘇蝕不可讀池中水清沙白拾渠鼎沸垢自浮
去沙底涌出者如濺珠出石壁縫者涼冷可喜壁上
丹粟殞爛駁犖余每浴必倚壁稍出向左則熱甚不
可探谿漲鰕魚誤入者單赤而斃水中苔色蒼翠此
又理之不可曉者出浴尋蓮花菴路寺旁巨石犬牙
互關疑不可入鄭無著借僧印我來導進桃源洞二
折達桃源桃杳交蔭已聞砰磅訇磕之聲選石登望

怒流飛注白龍潭躍珠凝碧殊令人留連復數折水
出本山左腋爲藥臼院曰之上游卽洗藥谿曰水寫
石坎中爲藥鈔藥鈔之水下寫白龍潭其漚處也綠
磴登嶺出密樹如翠幄欲亟瞻天都白雲漸開峯巒
畢現正中一峯指爲天都與諸峯立比肩不甚異僧
雛抱軍持汲藥臼水瀹茗肅入茶寮余擎一甌出忽
見天都改觀巖凝秀發薄日月參窈冥視鉢孟丈人
不當青鸞蓮花之趾青鸞蓮花又不能當天都之要
對之心開神爽自是生平第一觀也夜雨達曙隔谿
瀑布或如銀潢夾流或如玉蚪蜿蜒最上一派則如

飛絲篆煙搖曳淡雲中兩隙訪軒轅宮並紫石峯上
嶺入硃砂菴昔是羽人燒汞地禪僧普門新熾爲煉
魔場跨石絕谿而還宿處不一拘盧舍地兩菴相峙
而不相望者申一山障之也偶覩玄鶴思覘水簾洞
白鷗方問徑草深不果詣遇申黃冠叩之曰曩過有
芑堂見老子一編箋註者申清虛也君其人乎申曰
然道人自洋湖來采榮天都抖擻至半竟以狼狽歸
雲水迄今未常見此奇絕也雨浹辰不休鳥聲亦絕
獨白雲窺窗歎席冉冉親人或屏翳激之卽絕跡而
去以恣其卷舒縱橫之態賴不寥寂月之望有霽色

諸友不謀而集者余常吉莊伯幾汪深源吳孟堅延
季于民相率尋海子旦日過虎頭嶼雨暴至轉避嶼
下而歸侵晨再發則竝老人峯沿礪上異花珍藪時
錯怪松詭石間童子遇櫻桃謹甚摘以止渴睥睨霞
壁而闕者朱砂洞也雙禽戲洞口若有意以娛游人
杖上天都麓跂望不極就石橈少坐下象眼嶺值諸
工啓路倩一嚮導山有背合面分者從分處疊石而
上將千級中爲石壁折斷躡壁而過拾級登頂所啓
路止此纔數百步石豎如魚脊攀鱗鬣而上穿藂薄
里餘青壁竦峭磐石欲頽近壁水厓蘚澁陰森欲暮

寒氣逼人衆咎導者竟莫爲計忽空中飄梵唄聲咸愕然曰仙乎人乎豈木客勦人耶少選聲漸洪亮瞥見比丘跼壁立如遇津梁導者以肩承足聳身登厓或引縋至頂頂止受雙足躋者飛步而過比丘出自石竇中云前行不復迷矣卽所聞用公是也旣穿竇出坳日漸開朗藉草趺坐壑中突出一山摩空片石若依山起而與之爭高者復上里餘巨石傲兀衝壑中豐上銳下銳處僅納半蹟憑虛而過人人膽落出一線天山純石而駸駸中如劃開過者凜厲步不趣而速矣跡用公來徑直抵懸厓客怨童僕皆泣臨厓

而瞰多藤蘿余笑慰客曰路在是矣乃捫蘿躡壁爲杖所累擲去蘿盡綠木而下過海螺石遵鰲魚峯折而右連嶺上下曠衍爲海子謁天海菴菴後石壁新鐫一佛和南而過遂振衣絕頂危峯杳巘矯矯雲霄間石林立多奇姿逍遙者若仙莊嚴者類佛如冕衣之士介胄之夫如翔鸞舞鵠伏虎奔猊種種生動不暇應接行絕頂左極陜陜前復有石大如席風起心怖欲還深源先登余隨踵而過頰眎陰壑無地石峯矗起簇簇不可數益不可狀頂後卽外海視內海更大石連平天岡古松一株高二尺葉密布蔭數丈地

近面翠微諸峯駱驛峭嶠菁秀色可掬翠微外井邑村落谿介平疇別一風景倏忽雲生瀰漫游人如在天際還宿天海已昏黑衆皆寒顫煨楫柚共圍之明晨欲窮諸勝境雨至不果乃訪黃無心菴小不庇衆覓獅子峯旁團瓢元則躬居若水者山中葺茅而棲者凡幾獨此據勝地稱精舍西望匡廬盡成金碧雨後返照彩霞幻影直與龕中佛光交映故題其菴曰西明計新霽必有佳月丙夜起視冷豔如雪興劇發嘯隔山游侶驚起競以嘯和山谷響應次日諸友謂霖雨不休橐中糗且盡訂續游而還越飛泉游石屋遂

巡鳥道覓竒石於東源坑如碧玉如紫瓊者人得數枚乃行遙睇仙橋縹緲雲際自顧無羽翰不煩作過橋想出山阿卽爲通途聽鳴絃泉其聲悄悄看醉石真如被酒者不自支也復經虎頭嶺尋谿訪丹井龍司理題鱗石近是力憊踵躡息菴中三日濱行拾得山中白石如片雲戒豎子負歸以贈黃蘿道者

詩附

潘之恒

王子凡采黃山小石携贈玄龍爲賦

收得片雲俄化石携來近舍當看山不是君平能慣

識支機容易到人間

于凡遊黃山得紫石英歸貽左之

君向黃山采石英不因本草浪知名含光乍出軒轅

鼎紫氣人間夜夜生

黃魚字玄龍歙石嶺人

王子凡自天都峰貽石一片

踏遍蓮峰六六花採將片石付山家怪來半榻生奇

氣帶得軒轅鼎內霞

程國賓字尚之歙江村人

于凡携天都奇石贈玄龍有贈

靈峰奇石護雲衣偶踏天都得袖歸穀城舊物為君
贈不浪傳人識者稀

鮑正元字元則歙棠樾人

同前題

星漢支機差可擬穀城拾履未堪誇天風吹落芙蓉
色疑是峰頭舊煉砂

色氣異於前而書動也
墨紫支然全百氣幾幾合氣不與
同前題

韻不氣於人端若林

靈神育不端若云天階觀天
林林
靈神育不端若云天階觀天
林林

黃海 卷第

天都逸史潘之恒景升輯
斗南居士吳守正君卿校

紀游四之十六

游黃山隨札二

王之傑曰丙午夏與鮑元則盟於天都之下曠歲不
入山者為軒轅叛臣明年茶癖作楚弗果往戊申中
秋乃謀於同社潘景升黃玄龍共尋盟後四日臨發
景升復以事羈行近佛子嶺山雨霏微須臾日杲杲
出矣遠見天際數峰近若咫尺直欲御風入雲門也

踰石礎嶺脩竹萬竿憇息翠陰中林寒如凍不可久
坐過薌石想司馬之風流至香谿霧雨奄至羣峰盡
失擔簦造溫泉扣軒轅宮遂投蓮花菴玄龍慮雨害
游長樂曰僧方咒法雨使居士見山中瀑布寧願慮
乎明日界翠微而下者如僧語不復怨雨矣印我自
外至從過石橋看菊徧谿岍紫豔絕勝籬落間薄莫
還眺衆峰黯澹獨天都閃灼如丹砂蓋新霽返照相
射真奇觀也明發訪普門師於法海庵扳藤躋險登
觀音堂陟金沙領仰望天都頂石臺凌空而出背展
一屏方正聳拔因與玄龍語必軒后朝羣仙處乃望

臺而拜竝天都北徑甚巖爲之股慄經一石屏甚廣
跗僅容趾過者如攝鏡影及睨天都背亦有凌空臺
片石搯之其罅隙通明也下玉蘭谷印我謂花時過
此如行雪山中躡嶙峋而上度棧至蓮花洞極高廣
亦極窈窕左壁峭絕直出一折如墉去墉席許石筍
特起數十尺正當洞門壁上水懸溜作碎玉聲右壁
新鑿一門熹事者圖建精藍於洞頂入門轉進峽中
則架飛橋複閣以達精藍背負懸崖屨屨如覆近前
突起一峰峰頭石筍雙標如建幢旁一池泓碧卽噴
玉處夜宿洞中獨一侏儒僧守洞云爾時山中大半

恃蘆葍克鉢羣狼復藉以爲張其青黃而髯者大我
過半不敢逐霜降後冰雪封徑春杪方可出山洞中
風景如是耳遊人間之如落夢境恍惚布被流光及
醒見月穿洞門入真如濯魄冰壺中移時紅霞掩映
日出香爐石上矣遵舊蹊至領別出新術援蘿挽葛
而下履千級磴出詰曲石門新所闢也門內復有千
餘級較前威夷沿途尋向所會心處十失其五下天
梯石級可步非昔捫蘿躡壁矣與玄龍觀擲杖處咸
瑟縮而退踐臺右繞堂密崢嶸徑邊有石如欄欄外
窅不可測未敢凭視到黃海陟光明頂頂連有四望

五老峰起自壑中甚近此中不啻九老獨言五者以
其肩摩踵接也于時秋分海子中霜落已數日紅樹
盛於玉洞花天宇肅清所望極賒頂下大壑壇曼奇
峰恠石嵒嶮峭嶠如削如繡令人作峴崙玄圃想轉
平天岡北眺九華若螺髻揚子水出其下西望衆峰
纖巧若劒戟森列於雲門之側由陂陀披榛莽里許
雙峰對峙曰海門杖策蹠峰頂俯幽壑竟以奪魄還
探第二門重門也一扉如櫺玲瓏特異復過瀕闕而
瞰第三門三門相距各百武徑不盈咫尺門外斗絕萬
仞內無畔岬可依雖閱閭洞開無敢闕入窺者惟捷

踞其頂則石峰筆立與足底齊珠幢玉節碧筍瑤簪
 詭異戢昏昏神工鬼斧之所不必然者余與玄龍神
 沮形槁瞪目不敢發聲稍自收攝纔槃旋於飛雲石
 下石立如仙人掌高突臨虛復尋石床青岬如壁不
 敢造次上僧扶掖以登息倦於床連床有枕枕後一
 屏障之欹枕窺壑豁流一線縈繞而出印我謂鐵線
 潭當在是余戒僕從勿驚龍睡日暮宿天海菴曉起
 雨廉纖不絕雲封菴門平中開霽遠峰如黛間千片
 雪審視崩雲漏日薄霄隔之其光不暈白如雪也越
 光明頂出外海則決莽之野耳卉篠沒脛躋石見瓦

雲滿壑意必有奇觀俄而雲斂凡光明頂覽未盡者
 悉臚眼界中過此卽見石筍插天抵其砭丹嶂類杳
 思峰類天都筍皆類浮圖其纖銳插天者蔽於近不
 可見矣欲遂下岡窺龍潭訪松谷印我曰丞相源暨
 此徑壞於谿漲還游丹臺便臺在天海菴右二百餘
 弓廣幾十畝三面剝削前臨塹壑者用公庵也往峨
 嵎三日矣爲諮嗟久之菴前紫玉屏逼臺而起屏外
 石峰稜稜如承露金莖偃翠微僊丹臺屏頂虛粘卷
 石可作筆床研山不遇飛空仙人直欲狂殺米顛耳
 循臺而下臺壁嵌丹洞二臨幽澗有石蓮瓣各掩洞

口及絕西礪度領兩山欲合單通人行比出忽見卿
 雲環日幻種種色絢爛異常四顧蔚藍絕無纖翳玄
 龍曰日華也與子何幸見是其現止刹那不數里凡
 五現因名其峽曰五雲闕領曰望雲領出天門百盤
 而至白雲菴繇白沙領出經釣橋僧舍遂過湯領還
 蓮花菴遇金壇郝度寰海陽丁自宣郝問津入海已
 屬導者丁則結菴山中二年矣余嘉其人與談移日
 紀出山期已九月之朔

黃海

卷第

天都山史潘之恒景升輯
 還元道人朱之儒爾醇校

紀游四之十七

黃山行紀

吳日宣曰黃山峙縣西北百二十里而遙去余家幾
 百里古黟山也天寶末易今名以諸峰多類太華亦
 名小華或稱小崑崙云每從里中望見之神勃勃動
 已酉夏嗣宗邀與同游德常達生請俱往嗣宗德常
 余從弟達生則兄子從游者也里中長老及曾游者

以春夏雨浸道多流潦勸勿行頃從白下歸秋深矣
嗣宗復申前約德常達生不能從彥光彥雲二叔疇
昔所未期者乃得俱往時歸二日耳日已至侍郎墳
余小倦籍草枕肱卧童子貫炭煮茶午至容溪觀魚
則舍傍小池亂磚爲堵高不及膺方廣不踰丈魚數
十悠然適也已至上舍日頗烈礫石蒸人欲憩不得
俄而雲冉冉起風從曲阿當向來僂僂乎適矣踰嶺
坐牛頭口徑長潭修竹二三里許村民刈豆挂其中
竹葉布地薪者遺松枝間之行如履茵微有韻致可
五里抵石壁山下人家面石壁滿壁堅薪巔微土培

松數百居人對客必詳語諄諄上皇之遺風乎直行
數十步轉洽川橋復里許爲峽舍登山嶺迂迴數折
山形水勢約略相宜從上視下一徑如關弓其雜出
如棊道有墩中出圓如月水左右環合如束帶者三
羣木倒影沙石粼粼可當一盼投宿忠靈院曉行踰
嶺者四渡橋六七村居十數大略松杉森藹徑路縈
紆有水有山寡塵寡市視通衢別一境由方村望雲
門兩峰離立望而知其天關也日昏黃抵祥符寺未
入過湯池未浴蓮花菴僧道旁伺客略相酬對問法
海菴嗣宗偕余先登凡四折窺旛竿隱隱嗣宗呼佛

犬嗥嗥吠出籬間僧下逆客因商略所爲游狀靜空
獨難雲梯戒勿下視余領之法海爲諸僧鍊魔場珠
砂菴已作華嚴堂矣稱珠砂者山砂亮白員活如珠
故是夜覩鍊魔規束止宿華嚴堂中詰旦僧略具開
山始末將謀營繕向余指示基圖余望一團瓢在半
山中欲往僧引余去頗陡絕數折兩壁直豎中僅容
一人行一松疎秀覆其巔傍立石三四旣出轉團瓢
上遠望諸峰一目略盡坐未定侍者呼飯乃下略指
次華嚴堂後正枕天都蓮花老人青鸞紫石疊疊環
向福地審矣飯罷將山游僧蓮臺負瓜及米從東上
坐大石覩煙一縷老僧云從白龍池起是雨者徵達
天海望遠不堪可投蓮花洞宿耳余意頗不懌已而
霧四塞衆且皇皇從霧中覩懸厓天半若垣若墻有
門有堂僧手蒲團宛在中央則空相菴爲石壁現影
無不謂真者從石影去三里許得觀音厓一壁巉出
厓左一壁中赤色晃耀所謂硃砂洞是也去厓三丈
許峰頂一橫石如版覆垂外二尺餘若琢成者因陟
黃土岡坐樹蔭下聽山僧媚客俄而黃土弱借余姪
瑞生輩服短衣軒軒來誇我蓮花洞也旣別去轉得
二道從右達蓮花洞天海由左當路爲象牙峰徑頗

仄不果上坐見日光漏出霧中浮氣漸收則相與趨
天海山路似開似塞攀枯條踏亂石一壁中水潺潺
下轉至壁前曾不容足捫石懸度水濕襲衣裾行二
里達天梯梯出石峽間凡再折得七百四十級爲一
天門兩壁如堵上累數石覆之疑是風雷靈運孰謂
天險不可升也由此折旋不及里許爲蓮花溝溝有
洞出紫綠石焚之若燈光星散再上數十步壁石齧
齧如豕排牙又折上則二天門峰下開上閣涉級而
登級將嚙膝履其巔諸峰作態一石當面松蟠結據
其上奇古絕倫下上復數十步僅達三天門門平石

廣五六尺長丈餘可坐卧以攬諸勝復下百步登雲
梯一壁古松萬株不假土滋籠陰倚翠此猿猱之所
不到凝青翠而耐歲寒者也近好事家傍搜博採壯
觀盤石煙霞之性不耐人間數月而枯終年而萎人
害固然亦託根猶近耳如斯幽絕可如何因畱目久
之下梯百四十三級折得澗洞深丈廣仞再上爲一
線天上懸枯株欲墮對面螺螄峰卷石捲結傍蘿松
數株一線天之頂牽松鎖栢伏鯉鞭虬何譎詭也再
越里許爲至海石級未陟橫山小徑過山頭儼觀音
像疑立端然下澗一洞如曲尺深可丈許橫五尺餘

下數十步飛魚石鼓鬣排空宛然生動靜室四五游
僧散處其間小徑可達煉丹臺其石級坐蓮花峰左
前海右後海中平天岡余掘衣獨上問平天院遺趾
一佛像刻石壁窪石爲鑪累石爲塔茅宇蕭蕭僧不
可問矣投一指菴菴傍立石數疊如累松枝偃蹇卷
曲如老龍薄暮陟丹臺臺對翠微峰峰連筆架峰其
前玉屏峰峰後小峰如龍驤如虎踞如擁羽蓋如執
旛旛大若垂天之雲纖如竹枝如簫管纍纍如編珠
貫玉手不及指目不及觀丹臺之側爲獅爲象據巔
而望大平一抔九華一軸不覺天之高也直出數十

步爲海門尖峰數十百左迴右周前凸後凹下臨絕
壑倏而晴空一碧倏而雲氣摩天或露頂頭若浮舟
或出中邊如倚玉或開洞壑如鐵網珊瑚現則嶽崎
隱而冥混氣忽瀟湧如奔馬如飛星紫如烈焰騰薄
五色錯揉如絞絨索如貫長虹倏忽萬千吾惡能悉
其狀旁峙飛來峰高出羣峰數十仞陟頂修平其上
片石倚空直豎長約三仞廣及半之若側若欹若煩
安置投小石下相擊數百千聲更以大石相投爆塵
高出峰頭數仞伏窺無底爲鐵線潭復轉天門履平
岡松一株枝縱橫二丈餘高不盈尺頂秀結森如織

席兩傍數株如侍如從自是達光明頂挹雙海門奇峰撐天不容指數每峰必樹每樹必松從樹影指點諸鄉長河一線意觀止矣下過智空菴東海門石巒競湧銳者平者離者合者員中規方中矩上下中揖授直折中鈎繩三五步一巖十數步一岫犬牙相錯如阿房在陰疑紺在日疑朱錯采欲流濃翠欲滴氣色晃耀奪人目睛如建章宮闕周迴十數里許復過一岡頗險峻擊石作聲如爆竹約三里許至旃檀嶺香鑪高峙百仞石笋二峰大者不可登小者纍纍矗天而上嶺石數片勻置數方如戶每方變現各呈奇

特松出其上張翠蓋覆焉其外五老峰棋石峰形態畢具再折得隱空菴從菴前臨絕壑一峰五指旁連峭石望見一枝枝排列爲蠟燭峰石如架閣鼓爲天鼓峰折入平岡問慈愍菴牽茅跨石上煉丹峰峰前出爲晒藥臺廣平數畝石白三長者二尺員徑者尺餘深五六寸水盈盈不竭相傳有藥杵倚傍爲俗兒折去時重霧漫空望大壑滾如沸湯羣峰則海蜃樓臺有無幻相轉至清涼臺捫蘿數十仞得平岡寬廣數十畝余先登據石趺坐望匡廬一帶隱隱指顧間其下測仙潭潭下白龍潭深杳莫測下十餘里則松

谷菴天匾仙榜油榨溝峰洞諸勝未暇尋也俄叔弟輩攀援上霧塞不辨遠近遂尋別道至菴因下石筓岡其直出爲中源右出爲丞相源余取道丞相源陟石壁得方窻表裏通明諸如鑪頂文筆和尚仙人無不似者登嶺危陡巉絕徑不容足下臨百仞上摩層巔架薪爲梯懸空作棧每置一足手探枯椿椿實也乃敢移足足垂垂絆不得上走索耶探竿耶半仙戲耶向稍進爲壁所摩轉眄不得趾錯入藤石嚙不能出彥叔倚石攀薪喟然而嘆彼所謂舍身巖吾自舍耳此大逼我不得不舍約二里達仙燈洞洞高五十

餘仞前廣丈餘中半倍之後視中復廣者天深五十餘步一壁下隔爲二洞各廣四步有奇水從石滲出右洞一池一泓澄澄足供酌盥僧架木爲室塊處其間洞口古茗數十柯前僧所樹今僧撫有之溪出其下激石作聲余至洞時霧中咫尺不辨畱宿洞中曉日霽當向天都老人層層捲下如倒挂圍屏前一徑可達蓮花洞僧以道惡勸勿往因左匝抵丞相源亂草中行二里許書舍兩三間汪程諸友于此閉關略視無甚景色平岡小阜約如米家點染可指數者鉢盂峰九龍潭牌坊石而已從大道出苦竹溪小嶺紆

迴盤折雜樹千章團陰結翠日色淺淡篩影侵人清
溪潺潺耳間作響不知山陰道視此何如也再出湯
口日亭午因浴湯池憶聖泉峰爲源爲派再宿珠砂
菴投蓮花洞達洞二道一從天門平直可行余自黃
土岡履其難者凡再踰山岡多沙滑或石巉出不容
直入斜折過之平岡大石直豎若金剛端立冠危冠
近西一壁石竇天開恍明窻當案東壁數十仞中平
如門限旁如列柱植雲間余欲上未果已下橫木塞
道踰橫木得亂石里餘達洞巔兩峰夾出中峽怒石
谿衍可涉級下爲其險也旁懸空架木土薪填之右

遶復級木爲梯數步達洞洞口員上如佛龕深略不
及仙燈而視仙燈差廣左右罅水涓涓注右石旁小
洞如戶相通峰從右遶當洞前嶙峋如束竹管兩合
中罅隱隱樞一株當其前峰頭石竇員通舉首光來
恍瑤臺挂月稍出一墩爲座石笋出其上當峰稍亞
其端如猫踞兩耳直豎尾背具全下月池一泓澄徹
衆峰羅列引眇無涯舊故有石當中蓮心的的蘿松
合抱參天木葉匝地藤陰僧不解事斬其木刈其藤
夷其石余至則枯藤半挂小樹平厓僧以募供他行
雙扉晝閉竈鑪猶煖從者方炊飯余出其巔寬平殊

可結構飯熟從行僧擎一盂供佛余指嗣宗置香錢
 數文題其紙曰行脚何方去禪關鎖不開拈將香一
 辦畱與踏烟回歸路仍出珠砂菴茲游也雲叔倦不
 往畱止菴中余為譚勝槩且眷茲菴晨鐘夜鐸六時
 工課韻致悠然復畱宿四更餘琉璃掩映經僧禪誦
 從耳沁心嗟夫書生儻勤苦如此惡有不立行成名
 者乎蚤坐白龍池梯鱗石窺丹井探虎頭厓聽鳴弦
 泉視象鼻峰面水簾洞觀瀑布從鉢盂峰分行流注
 乃睠湯池宜易石屋以亭下池湮塞宜為疏導入祥
 符洪子嘉畱飯客語次仙燈達蓮花道固不甚惡因

憶靜空所畏雲梯戒勿視者余且四望不覺過之山
 水間人固不宜禁足于道路之口也飯罷相與踏橋
 臨水摘莎羅子食之將里餘別去回首雲門笑指而
 問之途次半露黛色將入于懷天都道中何吝一見
 至山口嶺枉道過硤中步象隄徘徊小園鹿溪主人
 引至華陽館其冷風閣碑司馬所記今為寓室不得
 讀之命鑰西枝佛像已徙去惟松芒匝徑堂廡闐寂
 啼鳥數聲令人意盡出山口雨勢欲來戒豎子前抵
 家漏下矣漫憶經行處名峰三十六水源如之溪二
 十四洞十二巖八其未經名如髮如粟余所履十未

能一二三聚勝宜莫如海中海道四一由湯嶺上白雲
 菴一由丞相源一由韭岡出水月菴惟自珠砂菴上
 攬勝為多環海四五里間菴者二十四汪介甫黃無
 心程念無具構有蘧蘆之舍介甫余邑青衿無心休
 寧胄子念無則金陵萬戶也遞興遞廢涉境為常大
 約石山多童而此無處不樹廣山多平蕪漫衍而此
 獨秀特幽妍一險一奇愈奇愈豁一轉一變愈變愈
 鮮于此悟天機于此窮文致誰作轉人誰下轉語誰
 為轉境入寥廓觀無何有之鄉哉余家豐樂浮阮二
 流合曹容注焉直下錢塘歸溟渤箬嶺嶺其南新嶺
 嶺其東散入浙中天台天目萬八千仞曾不及其趾
 峻極于天黃山之謂矣德常達生山水有緣不可不
 一至願至余所未至無令幽巖索寞也

詩附

吳日宣

字大士歙人

山中六首

首夏黃山約深秋始赴之雲林僧下榻楓葉客裁詩
 水曲經行處山窮得路時攀援知己拙誰與倩扶
 筆硯杖頭懸衾衾不滿肩笑譚忘日夕坐卧弄潺湲
 得句翻迷路忘機不解禪山人只炊飯無用酒家

認得路中路來尋山外山懸空猿徑度薄暮鳥隨還
遠漢寧勝縮微流不耐灣那知轉折處愈復費躋攀

脩竹間長松紆迴路欲封問茶梨好供買飯粟初春
禮數從疎濶逢迎自懶慵草堂畱宿處夜半已晨鐘

徑久祗容足天高擬致身閑雲曾識面幽鳥不嗔人
欲折登山屐誰投漉酒巾幾家籬落下小犬吠信信

斜日半林輝村居隱翠微石穿泉放溜煙重樹為扉
游客山中去田家夜半歸塵勞知己隔天路恍依稀

宿華嚴堂觀諸僧鍊魔

湯池無暇浴投宿日昏黃旛影逢初地枝棲得上方

魔消金鐸靜炬徹玉毫光爾我渾無相都來問寶航

僧蓮臺負米從游賦贈

宗風爾夙生年少玉英英字母從師訣禪心傍水清
問津開寶筏負米引山程珍重勞隨從烟霞欲定盟

晒藥臺

我來披宿莽興託為幽探倚杖臨危嶼牽衣掩薄嵐
青林霜一點丹訣石重函何自尋真藥空令石曰寒

登望四首

木落天空露湛秋登臨何必減仙游平吞曠莽裒真
氣直履巉巖到上頭萬里晴光雲外散諸峰曉色坐

來收須臾絕壑生烟霧瀛海冥茫漚亂浮
六六泉源六六峰清池朶朶孕芙蓉翠微洞口丹臺
聳紫石巖頭碧蘚封北倚九華千氣色東流三浙壯
朝宗不須吸露煩狎舉已上天梯展帝容
翠巘層層別一區軒皇曾此著靈樞仙蹤太古無碑
碣陳迹于今有曰鑪境隔葦羶魂亦淨情耽幽迥病
全蘇夜來涼月風吹墮好向空山覓寶弧
石罅穿松半是根寒松猶帶拂雲痕謾憐逝水分涼
燠豈有鳴禽逐曉昏雷篆幾行仙闕榜烟梯百仞玉
京門拈來金管將題字白眼看天天不言

